



PROJETU OPEN THE BOOKS FAZE II

**RELATÓRIU PESKIZA KONA-BA  
ASESIBILIDADE INFRAESTRUTURA  
PÚBLIKU BA EMA HO DEFISIÉNSIA  
IHA TIMOR-LESTE**

**OXFAM IHA TIMOR-LESTE**



Haforsa ami-nia ekipa hoabilidade atu analiza no monitoriza  
Orsamentu Jeral Estadu, nomos oinsa hakerek submisaun.  
Foto: Joanico Herman Soares Martins/Oxfam

# KONTEÚDU SIRA

REKOÑESIMENTU.....	iii
AKRÓNIMU.....	v
SUMÁRIU EZEKUTIVU.....	vi
KONTEKSTU NASIONÁL.....	1
ALVU NO OBJETÍVU SIRA.....	4
METODOLOJÍA.....	5
KUADRAMENTU POLÍTIKU NO ANÁLIZE.....	6
KONSIÉNSIA KONA-BA POLÍTIKA PÚBLICA.....	14
PERSEPSAUN KONA-BA ASESESIBILIDADE INFRAESTRUTURA.....	17
IMPLEMENTASAUN POLÍTIKA HO NIA PROGRESU.....	21
DEZAFIU SIRA.....	29
REKOMENDASAUN SIRA.....	31

# **REKOÑESIMENTU**

Publikasaun ida ne'e administra husi Oxfam iha Timor-Leste (OiT) no hetan apoio finanseiru husi Governu Austrália nia Departamentu Negósiu Estranjeiru no Komérsiu (DFAT) liu husi Austrália nia Programa Kooperasaun NGO (ANCP). Peskiza ida ne'e hanesan kontribuisaun ida ba projeto 'Open the Books' nu'udar parte OiT nia Pilár Justisa Ekonómika.

# **AUTÓR SIRA**

Lideradór Peskiza: Celso da Fonseca

Ko-Lideradóra Peskiza: Gertrudes Abedita Pereira

Kontribuidór sira: Lidér ba OiTl nia Programa Pilár Justisa Ekónomika: Adilson da Costa Junior  
Jestór Projetu ba OiTl nia Programa 'Open the books': Lucas Obe  
OiTl nia Asesór ba Peskiza no Análize: Tim Young

Enumeradór sira: Acacio da Costa, Elisabeth Lopes, Francelino dos Santos Serra, Severina Soares Amaral, Denilson Savio Marques da Silva, Edna da Cunha, Senhorina Madalena dos Santos, Alarico Fernandes, ho Junior da Costa de Araujo

Data Publikasaun, Juñu 2024

# AKRÓNIMU

ADTL	Asosiasaun Defisiénsia Timor-Leste
AHDTL	Association of Hearing Disability of Timor-Leste
ASOTL	Asosiasaun Olímpiku Espsesiál Timor-Leste
CDRTL	Konstituisaun Repúblika Demokrátika Timor-Leste
CNE	Komisaun Nasionál ba Eleisoens
CNR	Sentru Nasionál Reabilitasaun
CRPD	Konvensaun kona-ba Direitu Ema ho Defisiénsia nian
EhD	Ema ho Defisiénsia
JSMP	Judicial System Monitoring Program
KNP-TL	Komisaun Nasionál Paralímpiku Timor-Leste
LAWC	Legal Assistance to Women and Children
MNEC	Ministériu Negósiu Estranjeiru no Kooperasaun
MES	Ministériu Ensinu Superior
MOP	Ministériu Obras Públikas
MSSI	Ministériu Solidariedade Sosiál no Inkluzaun
MTC	Ministériu Transporte no Komunikasaun
NAP-PWD	Planu Asaun Nasionál ba Ema ho Defisiénsia
ODK	Open Data Kit (Ekipamentu Dadus Nakloke)
ONU	Organizasaun Nasoins Unidas
PNDS	Programa Nasionál Dezenvolvimentu Suku
PNIP-EhD	Política Nasionál kona-ba Inkluzaun no Promosaun Direitu Ema ho Defisiénsia nian
PRADET	Psychosocial Recovery and Development in East Timor
PURR	Relatório Periodic Universal Review
RHTO	Ra'es Hadomi Timor Oan
RTTL-EP	Radio Televizaun Timor-Leste
SEII	Sekretariádu Estadu ba Igualdade no Inkluzaun
SEFOPE	Sekretariádu Estadu ba Formasaun Profisionál no Empregu
SEKOM	Sekretariádu Estadu ba Komunikasaun Sosiál
SEJD/MEJD	Sekretariádu Estadu ba Joventude no Desportu/Ministériu Edukasaun, Joventude no Desportu
UNICEF	United Nations International Children's Emergency Fund
UNTL	Universidade Nasionál Timor-Leste
VPU	Vulnerable Person's Unit
WGQ	Washington Group Questions
AHDMLT	Asosiasaun Halibur Defisiénsia Matan Timor-Leste
ALFeLa	Asisténsia Legál ba Feto no Labarik

# SUMÁRIU EZEKUTIVU

Ema ho Defisiénsia (EhD) hasoru obstáculo oioin ba partisipasaun sosiál. Iha Timor-Leste, dezafiu hirak-ne'e inklui prejuizu barak, dezigualdade ekonómika, obstáculo ba emprego no edukasaun, no asesu ne'ebé la adekuadu ba servisu públiku no infraestrutura sira. Kombinasaun fatór sira-ne'e limita sira-nia integrasaun tomak iha sosiedade no perpetua marjinalizasaun sistemática. Atu rezolve dezafiu hirak-ne'e presiza iniciativa comprehensivu sira ne'ebé foka liu ba halakon diskriminasaun, hasa'e asesibilidade, no promove ambiente inkluzivu iha aspetu hotu-hotu moris nian. Liuhusi prioriza hasai tiha obstáculo hirak-ne'e, komunidade sira bele fó dalan ativu ba EhD atu kontribui no halo riku sira-nia patrimóniu sosiál, ekonómiku no kulturál, nune'e promove sosiedade ida-ne'ebé inkluzivu liu.

Timor-Leste foin lalais ne'e atualiza ona ninia Planu Asaun Nasional ba Ema ho Defisiensia (DNAP) no ratifika ona Konvensaun Nasoins Unidas nian kona-ba Direitu Ema ho Defisiensia (CRPD). Area krítiku ida-ne'ebé presiza atensaun dedikadu mak hadi'a asesibilidade ba servisu públiku no infraestrutura sira. Maske iha política nasionál oin-oin ne'ebé ho objetivu atu proteje EhD, implementasaun la konsistente no padraun asesibilidade ne'ebé bele ezekuta laiha. Ida ne'e subliña nesesidade ba lejizlasaun ne'ebé forte liu aliña ho diretiva CRPD no DNAP Timor-Leste nian atu asegura katak política hirak-ne'e bele realiza ho efetivu.

Estudu ida-ne'e buka atu avalia efikásia política asesibilidade ne'ebé eziste ba EhD iha Timor-Leste no halibur dadus baze hodi kontribui ba progresu iniciativa dezenvolvimentu inkluzivu sira. Liu husi avalia saun enkuadramentu política atuál, peskiza persepsaun público, no avalia saun asesibilidade infraestrutura, estudu ne'e ninia objetivu mak atu kaptura nesesidade emergente sira no avalia progresu implementasaun política defisiénsia nian.

Rezultadu sira hatudu katak dezafiu sira ne'ebé Timor-Leste hasoru hodi implementa ho efetivu DNAP no kumpre obrigasaun sira tuir CRPD nian mak multifasetadu. Barreira institusionál signifikante sira impede kumprimentu CRPD, inklui koordenasaun ne'ebé la efetivu entre ministériu sira, finansiamentu ne'ebé la adekuadu, no alinhamentu orsamentál ne'ebé fraku. Falta padraun akordu ba avalia saun dezeñu universál ne'ebé komplikadu liu tan, hanesan ambiguidade ne'ebé hale'u política akomodasaun razoavel. Asesu limitadu ba informasaun no dadus ne'ebé ladun suficiente no lori dezafiu hirak-ne'e hodi kria problema oioin ba ema ho defisiénsia sira, hafraku diseminasaun ne'ebé detallu esensiál sira no impede avalia saun política. Atu hatán ba dezafiu hirak-ne'e, propoin rekomendasaun balun:

- Aliña política no lejislasaun ho CRPD no Planu Asaun Nasional ba Ema ho Defisiensia (EhD).

- Halo revizaun ba Politika Nasional Inkluzaun no Promosaun Direitu Ema ho Defisiensia hodi hasa'e inkluzaun.
- Atualiza Planu Asaun Nasional ba Ema ho Defisiensia ho dadus sensu foun.
- Estabelese política formál no mekanizmu atu nomeia Embaixador ba Ema ho Defisiensia nian.
- Avansa padraun dezeňu universál liu husi lejislasaun foun, ne'ebé haluan ba setór privadu.
- Introdus padraun língua jestuál ba EhD no funsionáriu públiku selesionadu sira.
- Promove parceria ho Organizasaun Ema ho Defisiensia sira atu integra medida asesibilidade no monitorizasaun nia implementasaun.



Oxfam no parseiru sira envolve iha diskusaun grupu produtivu.

Foto: Aderito Do Rosario Da Cunha Mambares/Oxfam

# KONTEKSTU NASIONÁL

Iha mundu tomak, maizumenus populasau 1.3 billaun moris ho defisiénsia ne'ebé signifikante. Ne'e signifíka katak 16% husi populasau mundiál, ka ema ida husi kada ema na'in ne'en, konsidera ema ho defisiénsia.<sup>1</sup> Defisiénsia ho tipu oi-oin hanesan movimento fíziku, vizaun (matan), rona (tilun), komunikasaun (koalia), intelektuál, no mos dezorden psiko-sosiál oi-oin. Defisiénsia mos ho severidade ne'ebé la hanesan, no ema ho defisiénsia (EhD) barak enfrenta defisiénsia oi-oin dala ida. Tanba ne'e, defisiénsia sira bele kria impaktu bo'ot ba EhD nia moris no mos ba sira nia família. Nune'e mos, EhD dala barak marjinalizadu, no sira hanesan grupu ne'ebé vulnerável liu iha sosiedade.

**16%**

**Populasaun  
mundiál ho  
defisiénsia**

EhD dala barak enfrenta kondisaun sósio-ekonómiku ne'ebé negatívu liu, hanesan edukasaun no empregu ne'ebé menus, saúde ne'ebé fraku, no pobreza ka ki'ak.<sup>2</sup> Pobreza ne'e mos aumenta risku husi defisiénsia, tanba fatór sira hanesan malnutrisaun, asesu ba tratamentu saúde ne'ebé menus, kondisaun servisu ne'ebé la seguru, no saneamentu ne'ebé la adekuadu. Nune'e mos, defisiénsia bele halo ema ida ki'ak liu tan tanba defisiénsia dala barak limita oportunidade atu hetan edukasaun no empregu, limita rendimentu no aumenta kustu moris lor-loron nian. Tanba relasaun entre defisiénsia no fatór sósio-ekonómiku ne'e kompleksu tebes, esensiál ba ita atu responde ba kestaun rua ne'e hamutuk.

Iha bareira oi-oin ne'ebé limita EhD nia inkluaun sosiál no ekonómiku, hanesan atitude no tratamentu ho karakter diskriminatívu, falta fornesimentu servisu báziku sira, falta asesu ba ekipamentu ka teknoloxía asistíva sira, no limitasaun asesibilidade iha ambiente naturál no iha infraestrura sira. EhD presiza asesu ba servisu públiku no infraestrutura sira hanesan tratamentu saúde, facilidade edukasaun nian, facilidade kréditu, edifísiu governu no administrativu sira, transporte público, no espasu rekreasaun ka fatin halimar. Falta servisu no infraestrutura pública aumenta liu tan EhD nia vulnerabilidade no limita sira niaabilidade atu goza sira nia direitu no liberdade bázika sira.

Nasaun barak hako'ak metin importánsia inkluaun sosiál, no implementa ona medida signifikativa hodi garante EhD bele asesu ba servisu no infraestrutura tuir sira nia nesesidade. Eemplu bo'ot ida iha rejiaun Ázia-Pasífika mak Singapura ne'ebé hatudu ona nia vontande atu garante asesibilidade ba EhD. Tuir relatório ofisiál sira, maizumenus 80% husi edifísiu público sira iha Singapura atinji ona padraun báziku asesibilidade defisiénsia nian.<sup>3</sup> Nasaun seluk iha Ázia no mos iha rejiaun Pasífika realiza ona progresu iha área ne'e;<sup>4</sup>

<sup>1</sup> Retrieved from the Global report on health equity for persons with disabilities [EN/AR/RU/ZH] - World | ReliefWeb

<sup>2</sup> The World Bank (2023)

<sup>3</sup> Chua E. (2022) Speech by the head of Timor-Leste's delegation (i.e., Senior Parliamentary Secretary, Ministry of Social & Family Development, and Ministry of Culture,Community & Youth) during opening remarks at the 'Singapore Constructive Dialogue on the Convention on the Rights of Persons with Disabilities', Singapore

<sup>4</sup> United Nations Economic and Social Commission for Asia and the Pacific (2018) 'Building Disability-Inclusive Societies in Asia and the Pacific: Assessing Progress of the Incheon Strategy', Thailand

maske nune'e, maioria medida sira ne'e foka ba hadia asesu fíziku ba aeroporto no edifísiu governu sira iha kapítál sira (pur exemplu instalasaun rampa ba kadeira roda), no ladún konsidera nesesidade ema ho defisiénsia seluk hanesan defisiénsia matan ka tilun. Timor-Leste nu'udar estadu illa ki'ik ne'ebé sei dezenvolve hela, iha ne'ebé asesibilidade ba EhD sei menus tebes.<sup>5</sup> Dadus kona-ba asesibilidade iha rai laran tomak sei limitadu; tanba ne'e presiza dadus baseline hodi informa política pública sira, kria tarjeta sira ba dezenvolvimentu asesibilidade, no aloka fundus ne'ebé adekuadu hodi mellora situasaun ne'e.

Timor-Leste atinji ona progresu iha área oi-oin dezde restorasaun independénsia iha tinan 2002, maibé nafatin kontinua enfrenta dezafiu sócio-ekonómiku oi-oin. Atinjimentu balun hanesan aumenta populasaun nia asesu ba be'e-mo'os no saneamento, hadia kondisaun uma, prolonga espetánsia moris, no mos atinjimentu seluk.<sup>6,7</sup> Konstituisaun Repúblika Demokrática Timor-Leste nian garante sidadaun hotu nia direitu no liberdade sivíl sira. Kada sidadaun tenke heten oportunidade ne'ebé hanesan atu asesu ba uma, empregu, edukasaun, saúde, no protesaun sosiál. Maske nune'e, EhD seidauk hetan oportunidade ne'ebé hanesan iha Timor-Leste, no sira kontinua enfrenta obstáculo oi-oin hanesan diskriminasaun, estigma sosiál, no asesu ba servisu báziku ne'ebé limitadu.<sup>8</sup> Fatór hirak ne'e kria impaktu direitu no mos indireitu ba ema nia kualidade moris, no haforsa liu tan pozisaun EhD nu'udar grupu ida ne'ebé marjinalizadu liu iha sosiedade nia le'et.

Tuir Timor-Leste nia Peskiza Demografía no Saúde 2016, 21.6% husi respondente sira ho idade tinan 15 ba leten hato'o katak sira enfrenta difikuldade iha sira nia moris tanba defisiénsia ruma.<sup>10</sup> Dadus ofisiál sira liga ho prevalénsia defisiénsia iha Timor-Leste la konsistente.<sup>11</sup> Dadus husi Sensu Nasionál ba tinan 2022 hatudu katak só 1.3% de'it husi populasaun tomak bele konsidera nu'udar EhD; maibé deskonfia populasaun EhD atuál bo'ot liu estatística ida ne'e.<sup>12, 13</sup> Maske nune'e, susar tebes atu hetan dadus ne'ebé lós kona-ba EhD iha Timor-Leste tanba razaun oi-oin, hanesan definisaun defisiénsia ne'ebé la konsistente, peskiza kona-ba EhD uza kestionáriu ne'ebé la hanesan, bareira jeográfika sira ne'ebé limita asesu ba komunidade, no relatório ne'ebé refleita ema nia hanoin pesoal.<sup>14</sup>

---

<sup>5</sup> United Nations (2023) 'Situational Analysis Report on the Rights of Persons with Disabilities in Timor-Leste', Timor-Leste

<sup>6</sup> Government of Timor-Leste (2023) 'People-Centred Sustainable Development: Leaving No One Behind', The Second Voluntary National Review of SDG Implementation Progress (Timor-Leste VNR-2), Timor-Leste

<sup>7</sup> Government of Timor-Leste (2023) 'Timor-Leste Population and Housing Census 2022', Timor-Leste.

<sup>8</sup> Government of Timor-Leste (2002) 'Constitution of the Democratic of Timor-Leste', Timor-Leste.

<sup>9</sup> Timor-Leste Associação de Deficientes de Timor-Leste et al. (2021) 'Timor-Leste Disability Sector's Joint Submission on the Progress and Challenges of Disability Inclusive Development in Timor-Leste: Universal Periodic Review Report for 2021', Dili, Timor-Leste

<sup>10</sup> Government of Timor-Leste (2016) 'Timor-Leste Demographic Health Survey 2016', Ministry of Planning & Finance and the Ministry of Health, Dili, Timor-Leste.

<sup>11</sup> Ibid, op.cit... Government of Timor-Leste (2023) 'Timor-Leste Population and Housing Census 2022', Timor-Leste.

<sup>12</sup> United Nations (2022) 'Report for the Universal Periodic Review (UPR) of Timor-Leste: 40th Session of the UPR Working Group 2022', United Nations Country Team, Dili, Timor-Leste

<sup>13</sup> Ibid,

<sup>14</sup> Ray S. (2024) Remarks by Mr. Soumen Ray (Chief of Social Policy and PME; UNICEF) at the 'Workshop on Disability Data and M&E', 12th March 2024, Office of the National Institute of Statistics Timor-Leste, Dili, Timor-Leste

Durante prosesu Sensu Nasionál ba tinan 2022, enumeradór no respondente sira identifíka membru uma-ka'in nia kondisaun defisiénsia hanesan tópiku ne'ebé sensitívu liu.<sup>15</sup> Tanba ne'e, ema barak konsidera katak peskiza la kapta lolós prevalénsia defisiénsia iha Timor-Leste laran.<sup>16</sup> Dadus kona-ba EhD ne'ebé fahe bazeia ba idade, jéneru, tipu defisiénsia no severidade ne'e importante tebes. Informasaun ne'e influénsia ba governu nia desizaun atu aloka fundus no planeamentu programa ne'ebé tenta atu responde ba EhD nia nesesidade ne'ebé diversu tebes.

Estadu Timor-Leste hatudu nia vontade atu prioritiza programa ba EhD liu husi lejislasaun no política ne'ebé inkluzívu, hanesan 'Planu Asaun Nasionál Defisiénsia 2021-2030' (DNAP). Planu asaun ida ne'e elabora estratejía ka matadalan kona-ba implementasaun política pública kona-ba defisiénsia. Planu mos esplika kona-ba oinsá governu bele estabelese servisu interministerial, atu nune'e bele ajuda Ministériu sira no Sekretariádu Estadu atu kria inisiatíva integrada hodi suporta EhD no proteje sira nia direitu. Ministériu sira tenke operasionaliza política sira no garante katak servisu no infraestrutura pública hotu asesível ba EhD. Maibé, maioria edifísiu no espasu sira ne'ebé loke ba público seidauk asesível ba EhD. Situasaun ne'e limita EhD sira nia movimentu, asesu ba servisu esensiál sira, no partisipasaun iha sosiedade.

Organizasaun Ema ho Defisiénsia (OED) halo advokasía durante tempu naruk, no finalmente Timor-Leste sai parte estadu ba Nasoens Unidos nia Konvensaun kona-ba Direitu Ema ho Defisiénsia nian (CRPD) iha inísiu tinan 2023.<sup>18</sup> Konvensaun ida ne'e klarifikasi kona-ba lei internasional direitus umanus liga ho asuntu defisiénsia. Tanba Timor-Leste sai ona parte ba konvensaun ne'e, Timor-Leste agora hamri'ik hamutuk ho nasaun sira seluk hodi promete atu proteje EhD nia direitu. CRPD fó prioridade ne'ebé hanesan ba asesibilidade, no fó matadalan kona-ba obrigasaun sira ne'ebé garante asesu ne'ebé igual ba servisu no infraestrutura pública ba ema hotu. Análize ne'ebé Nasoens Unidas foin halo kona-ba situasaun direitus umanus EhD nian iha Timor-Leste subliña katak política pública atuál sira, hamutuk ho ratifikasi CRPD nian, estabelese ona enkuadramentu legál no política ida ne'ebé forte, atu nune'e bele fasilita dezenvolvimentu ne'ebé sensível ba EhD.<sup>19</sup> Maibé, relatóriu ne'e mos mensiona katak lejislasaun atuál sei falta padraun ida ba asesibilidade ne'ebé bele implementa. Tanba ne'e presiza fortifika ambiente política hodi aliña lei atuál sira liga ho defisiénsia, kompromísu sira husi DNAP, no guia sira ne'ebé mai husi CRPD.

<sup>15</sup> Ibid, op.cit... Timor-Leste Population and Housing Census 2022, Timor-Leste.

<sup>16</sup> Ibid, op.cit... Situational Analysis Report on the Rights of Persons with Disabilities in Timor-Leste, Timor-Leste

<sup>17</sup> Government of Timor-Leste (2021). 'Planuasaun Nasional Ba Ema Ho Defisiénsia 2021–2030', Dili, Timor-Leste

<sup>18</sup> United Nations (2024) 'Committee on the Rights of Persons with Disabilities', available online from: <https://www.ohchr.org/en/treaty-bodies/crpd/introduction-committee>

<sup>19</sup> Ibid,... op. cit... 'Situational Analysis Report on the Rights of Persons with Disabilities in Timor-Leste', Timor-Leste

# ALVU NO OBJETÍVU SIRA

Timor-Leste foin adopta CRPD, tanba ne'e tempu to'o ona atu hala'o estudu ida kona-ba política pública liga ho asesibilidade EhD nian, atu nune'e bele enkoraja diskusaun política no aselera formulasaun opsaun política atu bele implementa ho efetívu. Primeiru, estudu ida ne'e tenta atu ezamina efikásia política sira liga ho kestaun asesibilidade ba EhD. Tenke halibur dadus baseline ona-ba situasaun atuál liga ho asesibilidade, atu nune'e bele estabelese sasukat ba planu sira atu mellora asesibilidade iha futuru. Nune'e mos, estudu ne'e tenta atu deskreve kona-ba implementasaun política to'o agora, no mos aprende husi esperiénsia no hanoin ema ho defisiénsia no ema sein defisiénsia liga ho medida asesibilidade atuál sira. Objetívu espesífiku sira mak: 1) Avalia enkuadramentu político atuál liga ho asesu ba infraestrutura pública ba EhD, atu nune'e bele komprende nesesidade política sira nian; 2) Halo peskiza hodi komprende kona-ba público nia kompriensaun no persepsaun kona-ba política defisiénsia sira, inklui política sira nia efikásia no implementasaun; 3) Avalia asesibilidade infraestrutura pública iha Timor-Leste liu husi hanoin no esperiénsia EhD no mos ema sein defisiénsia; 4) Avalia progresu implementasaun política defisiénsia nian; no 5) Identifíka dezafiu sira ba melloramentu asesibilidade infraestrutura público nian.



Projetu Open the Books hala'o treinamentu ho párseiru sira.

Foto: Joâncio Herman Soares Martins/Oxfam

# METHODOLOGY

Estudu ida ne'e adopta metodolojia inter-disiplinária ida ne'ebé kompostu husi revizaun dokumentu sira, peskiza kuantitativa, no entrevista kualitativa ho informante xave sira. Ekipa peskiza halo revizaun kona-ba lejislasaun, política nacionál, artigu akadémiku, relatóriou husi ONG sira, no grey literature (relatóriou sira ne'ebé instituisaun estadu no ajénsia internasional sira pública) relasiona ho protesaun direitus umanus no infraestrutura pública iha Timor-Leste.

Estudu ne'e mos envolve entrevista informante xave sira atu bele comprende kona-ba prioridade governu nian no implementasaun política. Entrevista ho reprezentativa ( $N = 9$ ) husi Ministériu no Sekretariádu Estadu sira ne'ebé responsável ba koordensaun implementasaun DNAP. Ekipa peskiza prepara guia entrevista semi-estruturadu atu hetan informasaun kona-ba situasaun programa no planu ba melloramentu asesibilidade nacionál.


Ekipa peskiza Oxfam nian dezeña kestionáriu ida atu halibur persepsaun EhD no ema sein defisiénsia nian. Partisipante sira hatán pergunta nakloke no pergunta taka kona-ba sira nia hanoin no esperiénsia liga ho asesibilidade edifísiu, espasu, no servisu esensiál público. Iha tempu hanesan, ekipa distribui kestionáriu ida bolu 'Short Survey Washington Group Questions' (SS-WGQ), instrumentu válido ida ne'ebé fasilita partisipante sira atu fahe kona-ba sira nia kondisaun defisiénsia liu husi deskreve difikuldade sira liga ho kategória ne'en, hanesan mobilidade, vizaun, rona, komunikasaun, self-care (auto-kuidadu), no konsentrasaun.<sup>20</sup>

Ekipa peskiza adopta métodu purposive sampling (métodu iha ne'ebé peskizadór sira hili partisipante sira bazeia ba kritéria espesífika ruma) atu rekruta grupu partisipante kompostu husi EhD, familia EhD, membru komunidade, no funzionáriu público – ho rásio maizumenus 4:2:2:1. Asosiaun Defisiénsia Timor-Leste (ADTL) ajuda atu identifíka no rekruta EhD atu partisipa iha peskiza ne'e. Iha inísiu, ami sura populasaun tomak husi munisípiu tolu ne'ebé envolve iha peskiza, depois número populasaun ne'e mak determina tamañu ho nível konfiansa 95% no marjen erru 10%. Tanba ne'e, ami multiplíka dala rua no round-up (ajusta ba leten) número partisipante ne'ebé ami rekomenta sira ba random sample.

---

<sup>20</sup> Washington Group on Disability and Statistics (2024) 'Washington Group Short Set on Functioning (WG-SS)', available online from: <https://www.washingtongroup-disability.com/>

Partisipa iha levantamento ne'e ema na'in atus rua husi munisípiu tolu Baucau (N = 50), Bobonaro (N = 50), no Dili (N = 100). Munisípiu sira-ne'e hili atu reprezenta área jeográfika luan, ho Baucau reprezenta área rurál sira, Bobonaro Oeste rurál sira, no kapitál Dili nian reprezenta sentru urbanizadu Timor-Leste nian. Oxfam nia política internasional sira atu hala'o peskiza étika sira halo tuir ho rigorozu.<sup>21</sup>



## ENKUADRAMENTU POLÍTIKU NO ANÁLIZE

Foin lalais, Timor-Leste ratifíka 'Konvensaun ba Direitu Ema ho Defisiénsia' (CRPD), signifíka katak Timor-Leste agora tenke garante no promove direitu EhD tuir padraun internasional. Adezaun ba CRPD subliña Timor-Leste nia dedikasaun atu asegura igualdade, asesibilidade no inkluzaun ba EhD iha kualkér área, no marka pasu signifikatívu atu asegura katak Timor-Leste sai nasaun ida ne'ebé ekitável no inkluzívu liu.

Intensaun CRPD nian mak atu sai instrumentu direitus umanus ida ne'ebé mos tenta atu promove dezenvolvimentu sosiál. CRPD ne'e adopta definisaun luan EhD no afirma katak ema hotu ho kualkér tipu defisiénsia tenke goza direitu no liberdade fundamentál hotu. Nune'e mos, CRPD elabora área sira ne'ebé presiza adaptasaun atu EhD bele goza sira nia direitu, área sira ne'ebé violasaun direitu mosu, no área sira ne'ebé presiza haforsa liu tan protesaun direitu EhD nian.

Artigu 4 CRPD nian elabora obrigasaun jerál parte Estadu nian liga ho formulasaun política pública no programasaun inkluzívu, atu nune'e bele garante EhD nia direitus umanus no liberdade fundamentál.<sup>22</sup> Parte sira ne'ebé asína CRPD mos tenke aplika medida lejislatíva, administratíva no seluk ne'ebé apropiadu, atu proteje direitu hirak ne'e, elimina bareira ba asesibilidade, no koriji lei, regulamentu, kustumi ka práтика sira ne'ebé diskrimina kontra EhD.

<sup>21</sup> Oxfam International (2020) 'Ethical Content Guidelines: Upholding the Rights of the People in the Pictures in Content Gathering, Management and Use', The Hague, Netherlands

<sup>22</sup> United Nations (2024) 'Convention on the Rights of Persons with Disabilities', available online from: <https://social.desa.un.org/issues/disability>



Reflesaun Anual bá Projetu Open the Books ho parseiru sira.  
Foto: Joanic Herman Soares Martins/Oxfam



#### Asesibilidade

*Atu asegura katak ema ho defisiénsia bele moris independente no partisipa ho másimu iha kualkér área moris nian, parte estadu sira sei foti medida apropiadu hodi garante ema ho defisiénsia nia asesu, iguál ho ema seluk, ba ambiente fiziku, transportasaun, informasaun no komunikasaun, inklui teknoloja no sistema informasaun no komunikasaun sira, no mos ba fasilitade no servisu seluk ne'ebé loke ba públiku, iha área urbánu no mos rurál.*

#### CRPD Artigu 9

Asesibilidade nu'udar prinsípiu ka pilar sentrál ida CRPD nian, no kuaze Artigu hotu mensiona obrigasaun liga ho asesibilidade. Artigu 9 elabora obrigasaun balun ne'ebé hamri'ik mesak no foka liu atu garante EhD bele asesu ba servisu no infraestrutura públika ho iguál.

TCRPD prioritiza akontabilidade liga ho medida sira ne'ebé estadu sira foti hodi apoia EhD. CRPD obriga parte Estadu atu hatama relatóriou kompriensívu ida ba 'Komisaun kona-ba Direitu Ema ho Defisiénsia' másimu tinan rua (2) hafoin CRPD en vigór.<sup>23</sup> Ne'e signifíka Timor-Leste tenke hatama relatóriou ida ne'e tarde liu fulan Janeiru 2025. Relatóriou ne'e tenke elabora enkuadramentu konstitutionál, legál, no administrativu ba Konvensaun nia implementasaun. Tenke mos deskreve política no programa sira ne'ebé estadu adopta, no identifíka progresu ne'ebé estadu atinji liga ho realizasaun diretu EhD. Relatóriou tuir mai tenke hatama kada tinan ha'at (4), ka bazeia ba pedidu husi Komisaun. Relatóriou sira sei responde ba preokupasaun ka dezafiu sira ne'ebé mensiona iha relatóriou anterior, dekreve progresu ne'ebé atinji ona, no identifíka obstáculo sira ne'ebé estadu enfrenta iha prosesu implementasaun Konvensaun. Rekerimentu reportajen sira ne'e garante transparénsia, akontabilidade, no monitorizasaun implementasaun CRPD. Timor-Leste mos ratifíka

<sup>23</sup> United Nations (2024) 'Committee on the Rights of Persons with Disabilities', available online from: <https://www.ohchr.org/en/treaty-bodies/crpd/introduction-committee>

‘Protokolu Opsional’ CRPD nian hanesan akordu suplementár ida ne’ebé estabelese mekanízmu atu fasilita EhD halo keixa bainhira sira sente katak estadu falla atu garante sira nia direitu.<sup>24</sup> Protokolu ida ne’e rekoñese fiskalizasaun judisiária internasional, estabelese tipu akontabiliade importante ida ne’ebé forte liu, no haforsa CRPD nia implementasaun iha terrenu.

Bainhira política nasional kona-ba defisiénsia eziste tiha ona, importante katak política ne’e aliñadu ho rekerimentu CRPD nian. Presiza halo revizaun ba política pública sira ne’ebé adere ba CRPD, no mos política sira ne’ebé falla atu apoia CRPD, depois bele hadia política sira tuir nesesidade. Iha espetasau katak Governu Timor-Leste hanesan parte ba Konvensaun ida ne’e sei aselera implementasaun lejislasaun no política bazeia ba rekerimentu CRPD nian.

‘Konstituisaun Repúblika Demokrática Timor-Leste’ (CDRTL) adopta iha loron 22 Marsu 2002.<sup>25</sup> KDRTL konsidera progresívu iha nível internasional tanba rekoñese no proteje direitus umanus. Dokumentu fundamental ida ne’e kobre ho kompriensívu kestaun salvaguarda liberdade pesoal no direitu sócio-ekonómiku sira, hanesan direitu ba movimentu, cultura, relijiaun, uma, empregu, edukasaun, no saúde. Tuir Konstituisaun, Estadu Timor-Leste iha responsabilidade atu asegura direitu iguál ba sidadaun hotu, sein diskriminasaun bazeia ba rása, sexu, jéneru, relijiaun, ka kondisaun físico ka mentál. Artigu 21 fó rekoñesimentu espesífiku ba grupu vulnerável sira, no garante protesaun EhD.

‘Política Nasional kona-ba Inkluzion no Promosaun Direitu Ema ho Defisiénsia nian’ (PNIP-EhD) estabelese iha tinan 2012 liu husi Rezolusaun Governu Nú.14/2012.<sup>26</sup> Política ida ne’e nu’udar política primeiru iha Timor-Leste ne’ebé dedika ba EhD, parte husi iniciativa oi-oin ne’ebé tenta atu kria sosiedade ida ne’ebé inkluzívu no justu liu. PNIP-EhD rekoñese Estadu nia never Konstitusionál atu proteje EhD tanba sira nia pozisaun ne’ebé marginalizadu, no kobre kategória defisiénsia oi-oin. Política mos rekoñese importânsia direitu iguál no naun-diskriminasaun bazeia ba kondisaun físico ka mentál, no aliña ho Timor-Leste nia planu dezenvolvimentu estratéjiku nasional sira.<sup>27,28</sup> PNIP-EhD descreve enkuadramentu legál liga ho direitu EhD nian no sai dokumentu fokál ka matadalan ba política sira ne’ebé sei dezenvolve iha futuru.

#### Sidadaun ne’ebé iha defisiénsia

*“Sidadaun ne’ebé iha defisiénsia físico eh mentál iha direitu no más obrigasaun hanesan sidadaun sira seluk” [...] no “Estadu, wainhira bele, promove protesaun ba sidadaun sira-ne’ebé iha defisiénsia, tuir lei haruka*

#### KRDTL Artigu 21

<sup>24</sup> Ibid,...op.cit, United Nations (2024) ‘Convention on the Rights of Persons with Disabilities’.

<sup>25</sup> Ibid,...op.cit, Government of Timor-Leste (2002) ‘Constitution of the Democratic of Timor-Leste’, Timor-Leste.

<sup>26</sup> Government of Timor-Leste (2012) Government Resolution No. 14/12 ‘National Policy for Inclusion and Promotoin of the Rights of People with Disabilities’, Dili, Timor-Leste

<sup>27</sup> Government of Timor-Leste (2011) Timor-Leste’s Strategic Development Plan (2011–2030), Dili, Timor-Leste

<sup>28</sup> Government of Timor-Leste (2023) ‘Planu Estratégiku Dezenvolvimentu—Reajustadu ba 2023-2038, Dili, Timor-Leste

Kona-ba asesibilidade ba infraestrutura fíziku, PNIP-EhD deskreve bareira sira ne'ebé EhD enfrenta liga ho asesu servisu esensiál sira. Polítika mensiona importânsia atu responde ba obstáculo sira iha ambiente fíziku no asegura katak EhD bele asesu ba servisu sosiál sira, saúde, edukasaun, empregu, justisa, transporte, desportu, atividade kulturál, no informasaun. Polítika defini no deskreve área prioridade sira no estratéjia ba intervensaun hodi haforsa partisipasaun EhD iha vida sosiál oi-oin, liu husi aproximaçao 'servisu kolaborasaun integradu' ne'ebé envolve departamentu governu ne'ebé serivsu iha área no setór xave sira. Polítika mos defini programa espesífika sira ne'ebé tenta atu hadia ben-estar no kualidade moris EhD, hanesan kria servisu apoiu ne'ebé asesível, protokolu ba intervensaun sedu liga ho defisiénsia labarik nian, no promosaun asesu ba edukasaun ne'ebé iguál bazeia ba jéneru. Aleinde ne'e, política deskreve oinsá atu hadia asesibilidade ba infraestrutura, hanesan promove movimentu iha estrada ne'ebé seguru, hadia transporte públiku, no kria lejislasaun atu garante katak EhD bele asesu ba espasu, edifísiu no fasilitade públiku sira.

Estratejia sira iha PNIP-EhD hatudu katak presiza halibur dadus espesífika atu bele monitoriza efikásia política, inklui asesibilidade no mobilidade. Rekizitu dadus mak hanesan proporsaun ba fasilitade saúde no eskola sira ho infraestrutura adaptadu ba EhD, no proporsaun populasaun sira ne'ebé iha asesu ba transporte públiku ne'ebé adekuadu, ne'ebé organizadu tuir seksu, idade, no kondisaun defisiénsia atuál. Ida ne'e aliña besik ho indikadór ODS (ezemplu, ODS 3.8.1, 4.a.1, no 11.2.1).<sup>29</sup> Maske nune'e, PNIP-EhD falla atu<sup>30</sup> konsidera oinsá bele monitoriza asesibilidade ba fatin públiku sira (ODS 11.7.1), infraestrutura estrada, no edifísiu públiku sira seluk hanesan igreja, fasilitade kréditu, instituisaun governu oin-oin, no edifísiu komersiál sira.

UNESCO hamutuk ho Ministériu Solidaridate Sosial halo revizaun ida kona-ba PNIP-EhD iha tinan 2016.<sup>31</sup> Avaliasaun ne'e utiliza instrumentu análise política "EquiFrame" nian,<sup>32</sup> no hetan katak PNIP-EhD falla liga ho konseitu prinsipál balun, no más falla atu responde ho másimu ba kestaun xave sira liga ho asesu no prestasaun servisu públiku sira. Nune'e PNIP-EhD presiza hadia buat balun atu bele hamenus bareira ba asesibilidade. Importante mos katak política tenke rekoñese papél importante familia sira nian liga ho apoiu ba EhD, la'os de'it apoiu saúde. Ida ne'e presiza rekursu no apoiu atu hadia asesibilidade servisu no fasilita tratamentu ne'ebé olístiku. Servisu sira mos tenke adaptadu ba cultura, no tenke integradu atu rekoñese no respeita cultura, fiar, no práтика indivíduo no komunidade sira nian. Política tenke adopta provizaun sira atu proteje privasidade informasaun atu nune'e bele hametin

---

<sup>29</sup> SDG Indicators: 3.8.1 "Proportion of schools with access to adapted infrastructure and materials for students with disabilities", 4.a.1, 11.2.1 "

<sup>30</sup> Ibid

<sup>31</sup> UNICEF (2016) EquiFrame

<sup>32</sup> Equiframe tool original tool reference

EhD nia fiar. Ida ne'e bele mos enkoraja utilizasaun servisu, tanba EhD sei la preokupa violasaun konfidencialidade ruma, no bele mos hadia relatório demografiku ba estatística nasional sira. Tenke mos establese mekanizmu atu responde ba keixa no asegura akontabilidade entre fornesidór servisu sira, tanba ne'e importante tebes atu halakon lalais bareira ba asesibilidade

Aleinde ne'e, PNIP-EhD ladún konsidera kestaun interseksionalidade ka diskriminasaun oi-oin ne'ebé EhD vulnerável sira enfrenta. Ida ne'e importante tebes bainhira dezena solusaun atu atinji resultadu ne'ebé ekitável. CRPD fó konsiderasaun espesífika ba interseksionalidade jéneru. En jerál, painél sira ne'ebé avalia PNIP-EhD konsidera katak PNIP-EhD nia kualidade menus liga ho kestaun interseksionalidade.<sup>33</sup> Maibé PNIP-EhD seidauk iha alterasaun bazeia ba resultadu avalia sira ne'e.

Atu asegura implementasaun política ne'ebé susesu, PNIP-EhD obriga departamento governu no ajénsia Estadu hotu tenke hala'o atividade atu promove direitu EhD nian iha sira nia planu asaun anuál no aloka orsamentu adekuadu ba objetivu ne'e. Maske nune'e, política falta orientasaun espesífika ba implementasaun programa, no la fó esplikasaun kompriensívu no klaru kona-ba prosesu no mekanízmu sira. Maske nune'e, PNIP-EhD fó vizaun ida ne'ebé forte no bele suporta diretiva CRPD oi-oin. Política mos elabora ho klaru nia intensaun atu hametin asesu ba servisu públiku no infraestrutura sira, no husu governu atu establese Konsellu Nasional ba Direitu Ema ho Defisiensia atu harmoniza medida sira no tau matan ba implementasaun. Aleinde ne'e, PNIP-EhD subliña importânsia atu dezenvolve planu asaun nasional komplementár ida ba EhD no husu governu atu ratifíka CRPD.

Planu Asaun Nasional ba Ema ho Defisiensia 2021-2030' (DNAP) dezenvolve atu suporta implementasaun PNIP-EhD iha setór hotu-hotu liu husi diriji inisiatíva inter-ministeriál sira kona-ba formulasaun programa asaun sira<sup>34</sup>. Presiza planu asaun ida ne'ebé forte atu garante política nia impaktu, no planu tenke fasilita prioridade estratéjika sai inisiatíva konkrétu. Planu tenke mos mellora efisiénsia, transparénsia no efikásia programa sira. Tuir lolós, planu asaun sira tenke fasilita koordenasaun entre setór no parte interesada oi-oin, responde ba obstáculo sira, fasilita monitorizaun progresu, promove responsabilidade, no insertiva tranzisaun husi modelu finansiamentu ne'ebé bazeia ba projetu, ba fali finansiamentu programa nian.

#### Feto ho Defisiénsia

*Parte Estadu sira sei rekonese katak feto no feto labarik ho defisiénsia enfrenta diskriminasaun ho tipu oi-oin; tanba ne'e Parte Estadu sira sei foti medida atu garante katak feto sira sei goza sira nia direitu no liberdade fundamental sira ho másimu no igual*

#### CRPD Artigu 6

<sup>33</sup> Ibid,...op.cit, Government of Timor-Leste (2011) Timor-Leste's Strategic Development Plan (2011–2030)

<sup>34</sup> Ibid,...op.cit, Ray S. (2024) Remarks by Mr. Soumen Ray (Chief of Social Policy and PME; UNICEF) at the 'Workshop on Disability Data and M&E'.

DNAP nia períodu dezenvolvimentu la’o durante tempu naruk. Ezbosu ida propoin iha tinan 2014 atu integra ho PNIP-EhD, maibé la iha aprovasaun formál<sup>35</sup>. Governu rekoñese katak presiza hadia política, tanba ne’e iha tinan 2019 governu hala’o prosesu inkluzívua ida atu halo revizaun ba planu asaun hamutuk ho OED sira, atu antesipa Timor-Leste adezaun ba CRPD iha futuru. Governu simu DNAP 2021-2030 iha tinan 2021, no agora DNAP sai matadalan ba Ministériu no Sekretáriadu Estadu sira hodi dezenvolve sira nia programa no orsamentu sira atu fó apoiu ba EhD. Planu saun sira deskreve objetivu, hanesan avaliaisaun no alterasaun ba política pública hotu atu política sira aliñadu ho CRPD antes tinan 2025 nia rohan.

Rezolusaun ba Promosaun no Protesaun Direitu Ema ho Defisiensiā hetan aprovasaun husi Parlamentu Nasional iha tinan 2019 ho Rezolusaun Nú. 21/2019.<sup>36</sup> Política ida ne'e mosu hafoin semináriu nasionál ida kona-ba alkansa Objetivu Dezenvolvimentu Sustentavel (ODS) antes tinan 2030. Ajenda ODS nian subliña prinsípiu xave ida, katak ‘la bele husik ema ida iha kotuk’. Rezolusaun parlamentár ne'e mosu tanba nesesidade atu implementa planu no orsamentu ne'ebé sensível ba EhD no igualdade géneru. Rezolusaun rekoñese vulnerabilidade interseksionál ne'ebé feto ho defisiénsia sira hasoru. Política ida ne'e mos komplementa DNAP liu husi delineasaun provizaun estratéjiku sanulu-resin-rua ne'ebé ho objetivu atu hasa'e asesu ba facilidade saúde, edukasaun, empregu, formasau vokasional no sistema justisa. Liu husi pontu fokál espesífiku sira liga ho asesibilidade infraestrutura, política ne'e halo advokasia husu ba estadu atu garante katak eskola sira iha facilidade no rekursu sira ne'ebé adaptadu ba nesesidade labarik ho defisiénsia sira. Política mos husu atu aumenta uzu lian jestuál iha televizaun nasionál no iha tribunál. Política mos husu atu halo instalasaun lampu tráfegu ne'ebé permite EhD atu halo movimentu ho independente no seguru. Aleinde ne'e, política ezije atu estabelese enkuadramentu legál no infraestrutura física atu asegura katak edifísiu no espasu público hotu adopta medida ne'ebé facilita asesu EhD nian. Rezolusaun ida ne'e aliñadu ho Artigu 9 KRPD kona-ba asesibilidade.

Kona-ba kestaun EhD nia asesu ba empregu, ‘Kódigu Laboral’ ne'ebé estabelesidu liu husi Lei No. 4/2012, fornese provizaun espesífika sira ne'ebé tenta atu responde ba nesesidade traballadór ho defisiénsia sira nian. Artigu 71 foka ba igualdade, no tenta atu prevene diskriminasaun hasoru EhD liga ho oportunidade empregu, dezenvolvimentu profisional, promosaun, no kondisaun traballu. Aleinde ne'e, Artigu 75 obriga empregadór sira atu enkomoda funsionáriu ho defisiénsia sira liu husi adapta responsabilidade servisu no oráriu tuir ida-idak nia kapasidade. Maske Lei ida ne'e promove duni justisa ba EhD, maibé falta provizaun klaru ne'ebé obriga empregadór atu hadia ambiente física iha fatin servisu sira, buat ida ne'ebé esensiál atu facilita EhD nia asesu.

---

<sup>35</sup> Timor-Leste Disability National Action Plan for 2014 (Old Version).

<sup>36</sup> Resolution 14/2019 promotion of Persons with Disability.

'Polítika Nasional Edukasaun Inkluzívu' (NIEP) ne'ebé lansa iha tinan 2017 marka pasu importante ida iha prosesu promosaun asesibilidade edukasaun ba labarik vulnerável sira iha nível primáriu no sekundáriu. Polítika ida ne'e fó prioridade ba nesesidade edukasaun labarik ho defisiénsia sira nian, maibé mós subliña importânsia inkluzau ba grupu marginalizadu sira seluk. Hanesan matadalán ida, NIEP facilita Ministériu Edukasaun atu halo adaptasaun ba iha infraestrutura iha eskola rasik no mos iha área sira besik eskola. Adaptasaun hanesan rampa, korimaun, estrada no trotoar sira ne'ebé facilita EhD, no instalasaun bee, saneamentu no ijiene (WASH) ne'ebé inkluzívu. NIEP mos mensiona kona-ba adaptasaun instrumentu asisténsia sira hanesan material Braille no teknolojia audio, no deskreve kona-ba metodolojía hanorin inkluzívu sira ne'ebé adaptadu ba labarik no adolexente sira ho defisiénsia espesífika. Polítika halo advokasia atu establese servisu espesífiku iha eskola espesiál ba labarik sira ho defisiénsia mentál, tanba susar ba sira atu asesu ba sistema edukasaun público.

NIEP mos subliña nesesidade atu haforsa mekanízmu kolesaun dadus, monitorizaun no análise ne'ebé relevante ba edukasaun inkluzívu. Nune'e mos, NIEP halo advokasia ba koordenasaun entre ministériu sira atu responde ba dezafiu sira liga ho Ministériu Saúde, Edukasaun no Asuntu Sosiál sira, nune'e mós kolaborasaun ho sosiedade sivíl. Kona-ba kestaun edukasaun pos-sekundária, Ministériu Ensinu Superior, Siénsia no Kultura fó sai 'Livriñu Padraun ba Licensiamentu Instituisaun Ensinu Superior' iha tinan 2020 bazeia ba Orden Ministerial Nú. 090/GM/MESCC/II/2020. Orden ida ne'e elabora kritéria ba licensiamentu institusionál, inklui provizaun atu garante movimentu EhD nian, atu nune'e bele asegura EhD nia asesu ba universidade sira no facilidade edukasaun ensinu superior sira seluk. Hamutuk, política hirak ne'e garante obrigasaun sira ne'ebé deskreve ona iha CRPD tanba bele aumenta oportunidade edukasaun ba foin-sa'e ho defisiénsia sira liu husi hadia infraestrutura básiku sira.

Iha tinan 2020, Ministériu Obras Públicas (MOP) fó sai orden kona-ba implementasaun padraun dezeñu universál liu husi Despaixu Nú. 07/MOP/VIII/2020. Orden ida ne'e promove asesibilidade ne'ebé d'ak liu ba indivídu sira ne'ebé menus mobilidade iha edifísiu no fatín público no komersiál sira. Despaixu ida ne'e mensiona kona-ba oinsá Konstituisaun RDTL rekoñese igualdade sidadaun hotu nian, no tenta atu halakon diskriminasaun hasoru ema sira ne'ebé menus mobilidade. Maske la temi liafuan 'padraun dezeñu universál', maibé Despaixu nia aneksu ida elabora kona-ba regra asesibilidade téknika lubuk ida ba infraestrutura pública ne'ebé aliña ho padraun universál ne'e. Pur exemplu, regra esplika kona-ba rekizitu enxeñaria ba asensór, rampa, koredor, odamatan, eskada, korimaun, instalasaun WASH, trotoar, no pasadeira sira. Regra hirak ne'e tenke aplika ba projeto konstrusaun foun sira, no mos durante reabilitasaun infraestrutura sira ne'ebé eziste ona. Regra mos subliña kona-ba importânsia atu garante ema nia mobilidade livre liu husi harí'i drenajen ne'ebé adekuadu iha área urbanu sira.



Oxfam no parseiru lokál sira konvoka Sorumtu Kortezia ho Ministru Edukasaun.

Foto: Joanic Herman Soares Martins/Oxfam

MOP nia Despaixu mos rekoñese katak espesifikasi sira fó de'it medida atu hametin asesibilidade fíziku. Lakuna política bo'ot ida iha área ida-ne'e mak falta padraun dezeñu universál ne'ebé bele enkomoda ema ho defisiénsia mobilidade fíziku no mós ema ho defisiénsia seluk. MOP antesipa katak presiza dezenvolve no integra medida sira ne'ebé kompriensívu liu liga ho lei konstrusaun nesesáriuREF. Despaixu apoia maka'as provizaun CRPD nian ne'ebé tenta atu asegura infraestrutura pública ne'ebé tuir padraun dezeñu universál. Despaixu ne'e mak política primeiru ne'ebé fó instrusaun klaru kona-ba solusaun práktika sira liga ho kestaun konstrusaun infraestrutura atu fasilita asesu EhD nian. Maske nun'e, Despaixu nia frakeza ida mak la iha mekanizmu ida atu garante nia implementasaun. Ida seluk mak Despaixu ladún fó atensaun ba área sira ne'ebé la'os urbanu. MOP mak iha autoridade ba lisensiamentu no monitorizasaun ba projeto konstrusaun urbanu hotu-hotu; tanba ne'e, tuir lolós, parte sira ne'ebé envolve ho konstrusaun iha área urbanu sei adopta prinsípiu dezeñu universál sira bainhira tuir MOP nia diresaun. Maibe, importante tebes atu foti medida seluk ne'ebé bele kria mekanizmu implementasaun ne'ebé efetívu liu husi dezenvolve lejislasaun no mos implementa padraun governasaun sira ne'e iha área rurál sira.

Nesesidade política emergente iha Timor-Leste nesesíta aprosimasaun ida ne'ebé foku atu bele rezolve lakuna sira ne'ebé identifíka ona iha lejislasaun atuál no enkuadramentu política sira kona-ba direitu no asesibilidade EhD nian. Timor-Leste iha obrigasaun atu apoia prinsípiu sira ne'ebé deskreve ona iha CRPD, tanba ne'e esensiál atu aliña política atuál sira, hanesan PNIP-EhD no DNAP, ho diretiva sira CRPD nian. Esensiál tebes atu klarifikasi no espesifica política sira atu asegura implementasaun ne'ebé efetívu liu. Nune'e mos, inisiatíva política emergente sira tenke fó prioridade ba inkorporasaun padraun dezeñu universál sira atu responde ba defisiénsia mobilidade fízika, no mós ba nesesidade divérsu ema ho defisiénsia hotu nian. Presiza haforsa mekanízmu sira ba kolesaun dadus, monitorizasaun, no avaliaisaun, liu-liu iha área sira hanesan asesibilidade infraestrutura no prestasaun servisu, sei sai importante tebes atu sukat progresu no identifíka área sira ne'ebé presiza

hadia. Aleinde ne'e, tenke promove koordenasau n kolaborasaun inter-ministerial ho DPO sira atu hametin aprosimasaun holístiku hodi responde ba dezafiu oi-oin ne'ebé EhD hasoru. Ikus liu, política sira iha futuru tenke esforsa atu taka lakuna sira ne'ebé sei eziste, promove inkluzividade, no defende direitu fundamental sidadaun hotu-hotu nian, nune'e promove sosiedade ida-ne'ebé ekitável no asesível liu tuir padraun no obrigasaun internasional sira.

## KONSIÉNSIA KONA-BA POLÍTIKA PÚBLIKA

Agora ita sei haree fali ba kestaun konsiénsia público nian. Importante atu sukat sidadaun sira nia kompriensaun no rekoñesimentu liga ho política defisiénsia sira. Tranzisaun husi seksaun anterior mai seksaun ida ne'e hatudu interligasaun entre formulasaun política no envolvimentu público, no subliña importânsia estratéjia komunikasaun política sira ne'ebé inkluzívua no asesível. Konsiénsia público kona-ba política defisiénsia ne'e esensiál atu asegura justisa ba EhD no mos atu responde ba estigma no diskriminasau ne'ebé mosu beibeik. Bainhira komunidade comprende klaru kona-ba política hirak-ne'e, komunidade sira bele hametin respeitu no halo advokasia ba medida sira ne'ebé nesesáriu atu garante asesibilidade ba EhD. Partispasaun iha política publica fó kbi'it ba indivídu hotu, la depende baabilidade, atu nune'e ema hotu sei bele kontribui ho atívu ba sosiedade, promove inkluzau, no avansa prinsípiu justisa nian.

Estudu ida ne'e hatudu konsiénsia ne'ebé la hanesan entre partispante sira liga ho política ne'ebé apoia EhD no medida implementasaun sira. En jerál, maioria (58%) ladún hatene kona-ba provizaun no inisiatíva governu nian liga ho EhD. 25% indika katak sira hatene uituan, no 17% hatene barak kona-ba inisiatíva governu sira liga ho EhD. Rezultadu importante ida mak nível konsiénsia la aas liu ba EhD no sira nia família kompara ho respondente sira seluk.




### Konesimentu ba Politika



Husi EhD no sira nia família, proporsaun aas liu deklara katak sira ladún hatene kona-ba política no programa atuál sira liga ho EhD. Ami vizualiza resposta sira husi peskiza ne'e ba índise ida bolu Sensibilizasaun Politika Publika (SPP), ne'ebé ho nia valór entre 0-10, atu nune'e bele halo komparasaun entre grupu participante oin-oin. Valór aas signifíka konsiénsia boot liu. EhD ho sira-nia família iha SPP nia pontu ki'ik liu: 2.4 no 2.1, respetivamente. Membru komunidade baibain no funcionáriu públíku sira hato'o sira-nia konsiénsia política ne'ebé boot liu, ho valór SPP 3.8 no 5.0, respetivamente. Posibilidade funcionáriu públíku balun iha ona esperiénsia profisionál kona-ba inisiatíva ne'ebé relasiona ho defisiénsia. Tanba ne'e grupu ne'e nia nível konsiénsia jerál aas uituan. Maibé, rezultadu bele mos resulta husi ema nia persepsaun katak sira hatene kona-ba asuntu EhD, maske realidade mak sira rasik la iha esperiénsia direita ka koñesimentu kle'an kona-ba asuntu ne'e. Maske nune'e, rezultadu hatudu klaru katak EhD no sira nia família falta duni koñesimentu kona-ba política no programa apoiu EhD, no rezultadu ida ne'e subliña nesesidade atu hadia sosializasaun

### **Konesimentu Politika Bazeia ba Estatutu**



Participante sira ne'ebé iha ona koñesimentu kona-ba política sira relasiona ho defisiénsia halo votasaun kona-ba política no programa sira ne'ebé sira konsidera efetivu liu atu benefisia EhD. Respondente sira simu lista política no programa prinsipál sia (9) (Aneksu III). Husi lista ne'e sira bele hili opsaun oin-oin. Primeiru mak Polítika Nasional Inkluzau no Promosaun Direitu Ema ho Defisiénsia, tuir mai Politika Edukasaun Inkluzívü; 77% no 75% husi respondente sira konsidera katak política rua ne'e efetivu, respetivamente. 'Polítika Asesu Kréditu iha Banku ka Kooperatíva' no 'Programa Subsídiu Idozu' mak hetan valór ki'ik liu; maske nune'e, 43-45% husi respondente sira konsidera katak política rua ne'e apoia EhD. En jerál, participante nia konfiansa moderadu no aas kona-ba efikásia no benefisiu política sira relasiona ho defisiénsia. Maibé relatóriu sira seluk husi fonte oin-oin hatudu katak iha lakuna bo'ot entre política nia intensaun ho nia rezultadu sira.REF Rezultadu ida ne'e subliña katak importante tebes atu aliña objetivu política ho nia rezultadu sira. Tenke mos aloka rekursu ho eficiente, no asegura katak mekanízmu monitorizasaun no avaliaun sira implementa ho forte.

Depois, ami konvida participante sira atu fó sira nia rekomendasau kona-ba oinsá atu hadia política sira liga ho EhD. Participante nia resposta sira subliña nesesidade urgente atu hari'i infraestrutura tuir padraun universál hodi halakon obstáculo ba asesibilidade. Resposta mos mensiona katak importante atu hadia fali edifisiu públíku atuál sira. Participante fó sujestaun política lubuk ida, inklui implementa padraun asesibilidade ba edifisiu foun sira, inkorpora kritéria asesibilidade nian iha "Bill of Quantity" ba edifisiu foun sira, integra

konsiderasaun asesibilidade iha planu orsamentál ministeriál sira nian, no implementa estratéjia asesibilidade obrigatóriu iha edifísiu públiku sira. Prioridade seluk ne'ebé participante mensiona mak hadia no atualiza infraestrutura estrada no hametin EhD nia asesu ba facilidade saúde no edukasaun sira. Partisipante sira fó rekomendasaun oi-oin, inklui fornese infraestrutura espesiál atu suporta EhD atu bele hakat estrada ho seguro, estabelese eskola sira besik liu komunidade sira, no asegura transporte público no instalasaun WASH ne'ebé asesível. Presiza mos hadia implementasaun programa governu sira atu sai efetívu liu tan no mos envolve EhD iha prosesu halo política no foti desizaun. Respondente sira husu atu envolve EhD ho proativu iha diskusaun kona-ba asuntu asesibilidade sira.

Rezultadu hirak ne'e kona-ba partisipante sira nia konsiénsia kona-ba política EhD hatudu oinsá populasaun jerál kompriende política defisiénsia sira, no oinsá governu komunika ba pùbliku ho efetívu kona-ba política EhD sira. Informasaun ne'e sai hanesan baze ida atu bele promove ambiente ne'ebé inkluzívu liu. Hanesan diskute iha seksaun tuir mai, ema nia esperiénsia subjetívu no interpretasaun kona-ba ideia asesibilidade bele hetan influénsia husi sira nia koñesimentu kona-ba política atuál sira. Diferensa entre ema nia persepsaun kona-ba asesibilidade no asesibilidade iha realidade bele resulta husi fatór oi-oin, hanesan diseminaсаun informasaun kona-ba política defisiénsia. Nune'e mos, pùbliku nia konsiénsia kona-ba política defisiénsia nian bele influénsia ba nível apoiu no advokasia iha sosiedade ba medida inkluzívu sira. Bainhira konsiénsia menus, possibilidade iniciativa asesibilidade la hetan prioridade ne'ebé suficiente, no apoiu husi pùbliku ba infraestrutura inkluzíva bele menus. Maibé, bainhira konsiénsia pùbliku aas, bele promove asaun koletiva ne'ebé fó presaun ba autoridade sira atu fó prioridade no implementa política inkluzívu ho efetívu liu. Rezultadu ida ne'e subliña importánsia husi medida edukasaun, advokasia no práтика sira atu takalakuna sira liga ho implementasaun política.

Rezultadu hirak-ne'e implika katak nesesária atu hasa'e koñesimentu públiku no apoiu espesífiku ba EhD no sira nia família. Diferensa entre ema nia persepsaun efikásia política, no efikásia iha realidade hatudu katak importante tebes atu hadia mekanízmu avaliasaun sira. Asegura infraestrutura ne'ebé dezeña tuir pardaun universál, envolve governu ho proativu, no implementa política ho inkluzívu, hanesan pasu esensiál atu responde ba obstákulu asesibilidade no garante EhD sira nia moris di'ak. Presiza halo avaliasaun kona-ba konsiénsia públiku liga ho política defisiénsia atu nune'e bele komprende oinsá EhD no ema sein defisiénsia haree kestaun asesibilidade, no halo advokasia atu ezije medida inkluzívu sira atu suporta EhD iha Timor-Leste.



Oxfam and parseiru sira hala'ō hela diskusaun.

Foto: Aderito Do Rosario Da Cunha Mambares/Oxfam

# PERSEPSAUN KONA-BA ASESESIBILIDADE INFRAESTRUTURA


Dadus baseline kona-ba asesibilidade servisu públiku no infraestrutura iha Timor-Leste sei limitadu. Estudu ida ne'e avalia perspesaun kona-ba asesibilidade bazeia ba EhD rasik nia hanoin no esperénsia. Pontu importante ida mak persepsaun asesibilidade la hanesan ho asesibilidade objetivu. Asesibilidade iha realidade signifika ezisténsia fasilidade fíziku no utilizasaun fasilidade; persepsaun asesibilidade refleita ema nia esperénsia pesoal no interpretasaun kona-ba asesibilidade. Diferensa entre buat rua ne'e bele rezulta husi fatór oi-oin, inklui dezeñu infraestrutura, diseminasaun informasaun, no diferensa sósio-ekonómiku. Pur exemplu, sistema transporte público ida bele asesível ba kadeira-roda ho tuur-fatin dezignadu ba kadeira-roda. Maibé EhD ruma bele sente katak sistema ne'e la asesível tanba dezafiu sira iha estrada navigasaun, asisténsia ne'ebé la adekuadu, ka sira sente la komfortável atu uza. Tanba ne'e, importante atu comprende no responde ba persepsaun asesibilidade no asesibilidade iha realidade, atu nune'e promove ambiente ne'ebé inkluzívü no asegura asesu ne'ebé justu ba servisu esensiál sira ba membru sosiedade hotu-hotu.

Bazeia ba rezultadu estudu ida ne'e, iha nível nasional ema konsidera katak asesibilidade infraestrutura pública ba EhD sei mínimo tebes. Respondente sira mós konsidera asesibilidade la hanesan ba ema ho tipu defisiénsia ne'ebé la hanesan. Asesu ba ema sira ho defisiénsia fíziku ka mobilidade konsidera di'ak liu kompara ho defisiénsia sira seluk, tanba ne'e grupu ne'e hetan prémiu ho valór "Persepsaun Asesibilidade" (PA) 3.4 husi 10. Ba ema sira ne'ebé iha defisiénsia komunikasaun no intelektuál, asesibilidade konsidera mínimo, ho valór PA 1.8 no 1.7 respetivamente.

## Medida Asesu ba Espasu no Konstrusaun Publiku



## Asesibilidade Bazeia ba Tipu Defisiënsia oi-oin



Atu bele hatene kona-ba asesibilidade ba infraestrutura oi-oin, ami husu se partisipante sira observa ona medida ruma atu suporta EhD, liu-liu iha edifisiu público no fatin sira ne'ebé sira vizita tiha ona.

Respondente barak (39%) observa ona medida asesu báziku iha eskola balun, no barak mos observa instalasaun espsiál sira iha ospitál no klínika médica balun. Iha

igreja sira, 9% de'it husi respondente sira haree medida ruma ba EhD; grupu tomak ne'e hela iha Dili. Uitoan de'it (4-8%) haree ona fasilitade espesiál sira ba EhD iha eskritóriu administrasaun suku, banku ka instituisaun kréditu, parke público ka fatin rekreasau, ka infraestrutura estrada.

Resultadu hirak-ne'e sujere katak estadu implementa ona medida atu hadia asesibilidade iha fasilitade saúde no edukasaun. Maibé, falta medida sira iha área sira seluk hatudu katak sei iha obstáculo barak ba inklusaun sosiál, ne'ebé hamosu violasaun oi-oin kontra direitu konstitusionál EhD sira nian.

Kontrolu ba negósiu ekonómiku pesoal no asesu ba kréditu finanseiru no empréstimu nu'udar direitu fundamental ída tuir Artigu 12 CRPD. Karik EhD la bele asesu ba instituisaun sira ne'ebé fornese servisu finanseiru, ne'e konsidera violasaun direitu, no mos mantein eskuzaun ekonómiku no impede EhD nia independénsia finanseira no partisipasaun iha sosiedade. Iha tempu hanesan, asesu ba fatin adorasaun ne'e importante atu fasilita EhD atu goza sira nia direitu ba relijaun hanesan sidadaun sira seluk, hanesan provizaun xave ida iha Konstituisaun Timor-Leste.

Maske respondente barak observa medida apoiu asesu iha eskola balun no fasilitade saúde sira, medida la barak no maioria facilita de'it ema ho difikuldade mobilidade ka movimentu fíziku. Eskola barak iha Timor-Leste falta fasilitade báziku hanesan rampa no korimaun, no fízikamente la asesível ba EhD. Medida iha setór edukasaun no saúde atu ajuda ema ho defisiénsia tilun, matan no intelektuál menus tebes. Preokupasaun bo'ot ida mak dezafiu sira ne'ebé EhD hasoru bainhira tenta atu asesu ba fasiliade saúde esensiál sira, liu-liu ba sira ne'ebé presiza asesu tratamentu regulár tanba sira nia defisiénsia obriga.

EhD iha Timor-Leste hasoru dezafiu bo'ot liga ho mobilidade tanba dezena no manutensaun infraestrutura estrada ne'ebé la adekuadu, inklui ponte no trotoar sira. Sira nia asesu ba transporte público no veíkulu privadu sira mos limitadu. Tanba sira la bele halo movimentu ho livre, ne'e limita tebes ema ida-idak no independénsia, impede partisipasaun sosiál, no difikulta asesu ba servisu público esensiál sira. Nune'e mos, situasaun atuál obriga EhD barak atu la'o ho kadeira-roda iha estrada sira ne'ebé nakonu ho kareta no motór ne'ebé la'o lalais, no ida ne'e kria risku boot ba ema hotu.

#### Parte Estadu sira sei foti medida atu:

*Garante direitu igual ema ho defisiénsia nian atu sai na'in ba propriedade, kontrola sira nia finansa rasik, no asesu ba empréstimu no kréditu oi-oin husi banku, no mos asegura katak ema ho defisiénsia sei la lakon propriedade arbíru"*

CRPD Artigu 12


Ami la bele uza  
trotoar sira;  
dalan halo ami ta'uk.

**EhD: MATAN**

En jerál, infraestrutura pública iha kapítál Dili asesível liu kompara ho munisípiu sira seluk. Tanba governu nia administraun centrál iha Dili, iha ona iniciativa ne'ebé tenta atu hadia asesibilidade iha edifísiu públiku balun, hanesan edifísiu Ministériu Solidariedade Sosial no Inkluaun (MSSI) no Sentru Reabilitasaun Nasional (SRN). Respondente rekoñese edifísiu hirak ne'e tanba iha ona medida hodi fasilita asesibilidade iha ne'ebá.

Maske nune'e, situasaun asesibilidade iha munisípiu sira seluk aat liu, liu-liu iha Bobonaro no Baucau. Iha fatin rua ne'e, EhD hasoru dezafiu atu asesu ba assisténsia reabilitasaun, hanesan tratamentu fíziku no terápia okupasional husi servisu SRN sira nian. Maske MSSI aloka ona pontu fokál sira no estabelese sukursal sira iha nível munisípiu, falta fasilitade asesível sira iha eskritóriu hirak ne'e nafatin sai obstáculo bo'ot ida ba EhD.

## Pontu Asesibilidade hosi Fasilitade Bee Saneamentu no Ijiene



Peskiza subliña diferença entre rejiaun sira, no hatudu katak hanoin no esperiénsia la hanesan liga ho akomodasaun espesiál ba EhD atu asesu ba instalasaun WASH. Iha Dili, asesibilidade ba instalasaun WASH públiku ba EhD konsidera menus, no simu valór PA 3.5 husi 10. Situasaun ne'e aat liu iha Bobonaro no Baucau, no instalasaun sira iha munisípiu rua ne'e hetan valór PA ne'ebé ki'ik tebes – 1.9 no 0.6, respetivamente. Iha rejiaun sira ne'ebé envolve iha peskiza ne'e, asesibilidade ba instalasaun WASH públiku sira ba EhD iha relasaun pozitivu ho proporsaun uma-kain sira ne'ebé iha infraestrutura WASH ne'ebé adekuadu.<sup>37</sup> Falta kualidade fasilitade WASH uma-kain privadu nian bele rezulta husi problema sistemátiku sira ne'ebé influénsia ba servisu públiku sira.

<sup>37</sup> Timor-Leste Ministry of Finance and UNICEF (2021) 'Options Paper: Understanding and Measuring Multidimensional Poverty in Timor-Leste', Timor-Leste

Asesu ba sentina públiku no infraestrutura ijiene ne'ebé adekuadu kontinua sai dezafiu boot ba EhD.<sup>38</sup> Latrina sira dala barak la dezeña atu fasilita ema hotu atu uza. Falta instalasaun WASH públiku ne'ebé asesível viola EhD sira nia direitu umanu báziku no halo sira dependente liu tan, tanba dala barak sira depende ba asisténsia husi ema seluk bainhira uza fasilitade ne'ebé la adaptadu ba EhD. Bainhira EhD la iha asesu adekuadu ba fasilitade saneamentu sira iha fatin ne'ebé la'os sira nia uma, ida ne'e difikulta fali sira nia edukasaun, empregu, no partisipasaun sosiál.

Ekipa peskiza husu partisipante atu esplika kona-ba oinsá sira halo desizaun bainhira hatán ba pergunta sira. Esplikasaun sira mensiona kona-ba dezafiu no sentimentu balun. Kestaun xave sira ne'ebé respondente identifíka inklui falta asesu ba kadeira-roda ne'ebé suficiente, falta matéria Braille, falta sinál iha fatin públiku no edifísiu sira. Partisipante balun fó hanoin katak governu la fó prioridade atu rezolve problema hirak ne'e ho efetivu. Sira mensiona evidénsia hanesan identifíksaun EhD ne'ebé la suficiente no dezenvolvimentu programa ba tipu defisiénsia oi-oin ne'ebé mínimu tebes.

Respondente nota katak autoridade sira no públiku falta konsiénsia no kompriensaun kona-ba nesesidade EhD nian, no ida ne'e hamosu diskriminasaun no prestasaun servisu ne'ebé la adekuadu. Respondente balu rekoñese katak estadu halo ona esforsu, maske limitadu, hanesan programa asisténsia no melloramentu iha área balun. Maibé, maioria konsidera katak asesibilidade la suficiente. Respondente sira subliña importânsia planeamentu no



Grupu sira halo hela diskusaun.  
Foto: Joanico Herman Soares Martins/Oxfam

<sup>38</sup> Timor-Leste Ministry of Finance and UNICEF (2021) 'Options Paper: Understanding and Measuring Multidimensional Poverty in Timor-Leste', Timor-Leste

implementasaun medida asesibilidade ne'ebé kompriensívu. Ida ne'e signifíka tenke envolve EhD sira ho atívu iha prosesu foti desizaun no fornese rekursu esensiál no formasaun ba ofisiál governu no komunidade jerál sira. Inisiativa hirak ne'e importante tebes atu garante inkluaun no asesu ba facilidade no servisu públiku ne'ebé hanesan.<sup>38</sup>

Kona-ba kestaun se mak responsável atu hasa'e asesibilidade ba EhD, iha espetausun bo'ot katak governu mak tenke foti asaun hodi responde ba nesesidade EhD iha Timor-Leste. Respondente barak temi katak kolaborasaun entre governu no ONG sira, nacionál no internasionál, importante tebes atu prepara facilidade no servisu sira ne'ebé asesível ba EhD. Respondente barak mensiona katak governu tenke aloka rekursu orsamentál ne'ebé suficiente hodi hadia asesibilidade no apoiu servisu sira ba EhD. Balun tan mensiona katak presiza prioritiza no responsabiliza relasionala ho kestaun alokasaun rekursu ne'e. Klaru katak iha apelu koletivu ba governu no organizasaun relevante sira atu implementa medida proativu sira hodi asegura inkluaun no apoiu ba EhD sira iha setór no área oioin.

Rezultadu hirak ne'e subliña nesesidade urgente ba política inkluziva no asaun sira atu hasoru obstáculo sira ne'ebé EhD hasoru liga ho asesu ba infraestrutura pública. Bareira sistemátiku limita EhD nia partisipasaun no oportunidade sira, no ida ne'e mantein dezigualdade. Diferensa entre rejiaun sira mos hatudu nesesidade ba intervensaun espesífika iha área rurál sira. Autoridade no público sira falta konsiénsia kona-ba kestaun no tipu defisiénsia oin-oin, no ida ne'e hatudu klaru katak presiza haforsa edukasaun no advokasia. Atu responde ba rezultadu hirak ne'e presiza esforsu kompriensívu atu reforma política sira no aloka rekursu ho efetívu.

## IMPLEMENTASAUN POLÍTIKA NO PROGRESU

EhD iha Timor-Leste enfrenta obstáculo barak ba sira nia partisipasaun iha sosiedade. Maioria infraestrutura no servisu público sira iha Timor-Leste agora dadaun la asesível ba EhD. Fatór ambientál, institusionál no sócio-ekonómiku oin-oin mak kontribui ba situasaun ida ne'e. Maske iha ona lejislasaun no política sira ne'ebé iha objetivu atu rezolve dezafiu hirak ne'e, sei iha difikuldade implementasaun ne'ebé hafraku efikásia inisiativa sira hanesan DNAP.

Besik tinan sanulu liu ona entre aprovasaun política nacionál kona-ba EhD no aprovasaun planu asaun nacionál ba EhD. Aprovasaun tarde ne'e halo progresu kona-ba apoiu EhD la'o neineik tebes. Iha tinan 2023, governu relata iha sira relatório kona-ba implementasaun ODS iha Timor-Leste katak implementasaun DNAP sai nu'udar prioridade prinsipál ida.REF Maske nune'e OED sira hato'o sira nia sentimentu iha tinan 2024 dehan katak asaun sira ne'e seidauk suficiente. OED sira husu ba Governu atu aloka rekursu hodi operasionaliza DNAP ho efetivu.REF

Maske Estadu enfrenta dezafiu oin-oin, Estadu konge realiza inisiativa sira ho objetivu atu suporta no proteje EhD. Esforsu internu sira fó prioridade atu hametin funsionáriu sira nia kompriensaun kona-ba kestaun no direitu defisiénsia sira, promove utilizasaun linguajen



Foto ida tradús língua jestu, promove komunikasaun inkluziva ho ema ho defisiënsia.

Foto: Aderito Do Rosario Da Cunha Mambares/Oxfam

ne'ebé la diskriminatóriu, no promove koordenasaun inter-ministeriál hodi haforsa dezeňu no implementasaun programa. Asaun konkrétu sira ne'ebé rezulta husi prosesu sensibilizasaun ne'e hanesan nomeasaun embaixadór defisiénsia sira iha Ministériu ididak, rekrutamentu ema ho defisiénsia sira nu'udar funzionáriu, no aumenta kolaborasaun ho OED sira. Maske asesibilidade ba infraestrutura no servisu públiku ba EhD iha área barak sei menus tebes, maibé iha duni progresu ne'ebé atinji ona iha área balun.

Ministériu Juventude, Desportu, Arte no Kultura (MJDAK), antes ne'e Sekretariádu Estadu Juventude no Desportu (SEJD), sai nu'udar exemplu di'ak ida iniciativa kompriensívu atu fornese akomodasaun asesível ba EhD. SEJD hamutuk ho Fundu Internasional Emerjénsia Labarik Nasoins Unidas harri fasilitade iha tinan 2022. Sira kria fasilitade asesibilidade inkluzívü ho dezeňu ne'ebé tenta atu fasilita ema ho tipu defisiénsia oi-oin. Iha entrada sira instala bloku orientasaun ba ema sira ne'ebé iha defisiénsia vizaun, primeira vez fasilitade hanesan harri iha Timor-Leste. Medida asesu sira seluk inklui sinál ba ema sira ne'ebé ho defisiénsia rona, kadeira-roda, elevadór, instalasaun báziku balun iha sala konferénsia, no instalasaun espesializad WASH.<sup>39,40</sup>

Iha eskritóriu MSSI, falta ekipamentu asistíva sira hanesan matéria Braille, instrumentu atu hakerek letra Braille, programa komputadór ne'ebé koalia sai, no bengala no bloku atu ajuda EhD atu la'

Informante Xave, MSSI

<sup>39</sup> Ibid,...op.cit, World Health Organisation (2022) 'Global Report on Health Equity for Persons with Disabilities', Geneva, Switzerland

<sup>40</sup> Key informant: Ambassador to Persons with Disabilities MEYS, 13 March 2023.

Ministériu Solidariedade Sosial no Inkluzau (MSSI) nu'udar órgaun governu nian prinsipál ne'ebé iha knaar atu proteje no promove direitu EhD nian. Ministériu ne'e lidera no superviziona ezekusaun DNAP liu husi kolaborasaun ho OED sira no departamentu governu sira seluk. Iha MSSI nia eskritóriu centrál iha Dili, iha ona medida asesibilidade hanesan rampa no elevadór. Maske nune'e, MSSI iha planu ona atu haforsa asesibilidade ba EhD iha futuru atu kumpre ho padraun dezeňu universál sira.<sup>41</sup> Bainhira ita haree programa servisu ne'ebé MSSI mak responsável ba, tenke asegura katak MSSI nia edifísiu sira asesível hotu, tanba ne'e esensiál tebes atu hatudu sira nia kompromisu atu garante inkluzau no sai exemplu di'ak ba ajénsia governu sira seluk.

Ministériu Obras Públicas (MOP) rekoñese ona katak asesibilidade ba EhD ba obras públiku sei menus. Tanba MOP rekoñese ona katak esensiál atu integra prinsípiu dezeňu universál sira iha inísiu projeto ida-idak, MOP ninia objetivu ida mak atu prioritiza aprosimasaun ida ne'e iha dezenvolvimentu infraestrutura no utilidade sira iha futuru. MOP iha ona kompromísu atu promove koordenasaun inter-ministeriál hodi hasa'e konsiénsia entre instituisaun governu hotu-hotu no fasilita implementasaun infraestrutura pública ne'ebé dezeňa tuir padraun universál. Estratéjia ida ne'e tenke integra iha planu asaun Ministériu no Sekretariádu Estadu relevante nian ne'ebé envolve iha implementasaun DNAP 2021-2030. MOP mos planu atu haluan espesifikasiasaun dezeňu universál ne'ebé deskreve ona iha Despaixu Ministeriál Nú. 07/MOP/VIII/2020 hodi inkorpora padraun adisionál sira ne'ebé responde ba indivídu sira ne'ebé ho tipu defisiénsia oi-oin. MOP sei servisu hamutuk ho OED sira no husu OED sira atu kontribui ba kampaña advokasia no atividade sosializasaun sira. Nune'e MOP sei promove prosesu foti desizaun ne'ebé inkluzivu no asegura efikásia programa sira nian liga ho asesibilidade ba EhD.

Ministériu Transporte no Komunikasaun (MTC) implementa ona iniciativa oi-oin hodi hasa'e asesibilidade iha setór transporte no komunikasaun. Pur exemplu, Diresaun Nasional Transporte no Terrestre (DNTT) iha Hera halo esforsu atu ajuda EhD atu bele hetan lisensa kondutór no sai na'in ba veíkulu fasil liu. DNTT instala ona rampa asesu iha fatin prosesu lisensiamentu nian, halo modifikasaun ba veíkulu sira tuir EhD nia nesesidade, no dezenolve kondisaun atu teste sai inkluzivu liu. MTC implementa ona matadalan kona-ba Prosedimento Operasional Padraun hodi hametin sistema apoiu ba EhD durante prosesu ezamimasaun lisensiamentu kondutór nian.

Governu hadia ona asesibilidade ba servisu ró Berlin ne'ebé fornese transporte ba público ba illa Ataúro no mos ba Oecusse. Iha ona plataforma móvel ida ne'ebé instala iha jetty atu akomoda rampa tetuk ida ba pasajeiru sira atu tama no sai ró, ne'ebé fasil liu kompara ho rampa uluk ne'ebé lolon liu. Ida ne'e fó benefísiu bo'ot ba labarik, katuas-ferik sira, no EhD. Iha mos rampa kadeira-roda ida atu fasilita indivídu ne'ebé ho mobilidade menus asesu ba ró.

---

<sup>41</sup> Key informants: National Director for the Promotion of Personal Rights of Persons with Disabilities Focal Point of Planning and Program of DNPD-MSSI., 21 March 2023.

MTC iha ona planu atu dezenvolve tan medida asesu sira ba EhD iha Dili, hanesan konstrusaun para fatin espesializadu ba bis, sinál tráfegu ne'ebé inkluzivu, no instalasaun lampu tráfegu sonoru iha fatin sira ne'ebé EhD uza beibeik, fatin sira hanesan edifísiu MSSI, edifísiu OED sira nia oin (hanesan Asosiasaun Defisiensia iha Timor-Leste), no área Palásiu Governu nian.<sup>42</sup> Maske inisiatíva balun la'o dadaun ona, MTC presiza halo esforsu no koordenasaun atu kria kondisaun transporte públiku ne'ebé adekuadu ba EhD.

Iha tinan 2018 Governu lansa 'Planu Mestre Setór Transporte' ne'ebé tenta atu elabora sistema transporte ida ne'ebé seguru no kumpre ho padraun ambientál modernu, no mos konsidera grupu marjinalizadu sósio-ekonómiku sira. Maske nune'e, Planu política ne'e la rekoñese espesifikamente EhD iha laran. Banku Dezenvolvimentu Aziátiku (ADB) no MTC servisu hamutuk dezde tinan 2022 hodi dezenvolve 'Projetu Transporte Públiku' (PTP) iha Timor-Leste. ADB kontribui ona asisténsia téknika no fundus atu avalia sistema transporte públiku atuál, kria dezeñu ba terminál bis foun, no hakerek ezbosu Planu Mestre PTP nian ida ne'ebé sei apresenta atu hetan aprovasaun iha tinan 2024. Iha análise inisiál kona-ba kestaun ki'ak no sosiál nian PTP hato'o sira nia kompromísu atu hamenus ki'ak no hametin inkluzau sosiál. Ida ne'e hatudu importânsia atu responde ba nesesidade EhD nian liga ho sira niaabilidade atu halo movimentu ho livre. Projetu ho valór dolar millaun \$45 planu atu harii terminál bis sira, inklui fatin hein no facilidade ba pasajeiru ne'ebé komfortável, kria planu klaru ba bis sira atu la'o ba ne'ebé no la'o tuir oráriu, garante bis sira nia manutensaun di'ak, garante katak terminál sira la do'ok liu, instala facilidade ba labarik sira, no instala komponente ne'ebé fasilita EhD atu asesu.

Estadu mos atinji ona progresu iha área komunikasaun no teknolojia. Sekretariádu Estadu Komunikasaun (SSCOM) implementa ona programa komunikasaun inkluzívua ida liu hosi kanál televizaun nasional sira, hanesan inkorpora lian jestuál ba iha transmisaun notisia sira. Maibé website sira iha Timor-Leste barak liu seidauk uza dezeñu ne'ebé fasilita ema ho defisiénsia matan atu uza. SSCOM deklara ona katak sira implementa hela funsaun audio no formato testu espesiál iha website balun.

#### **Parte estadu sira sei foti medida atu:**

*Promove tipu asisténsia próprio sira seluk no apoia ema ho defisiensia atu garante asesu ba informasaun, no promove asesu ba ema ho defisiénsia ba informasaun, teknolojía no sistema komunikasaun foun, hanesan Internet*

#### **CRPD Artigu 9**

---

<sup>42</sup> Key informant: Head of Planning MTC / Head of the Gender Work and Social Inclusion Section, 21 March 2023

Ministériu Edukasaun (ME) mak tau matan ba ‘Política Edukasaun Inkluzív’ liu husi nia programa inkluzividade nasional. Maske programa ne’e implementa ona dezde tinan 2017, labarik sira ne’ebé ho difikuldade mobilidade seidauk bele asesu ba eskola barak tanba falta rampa, instalasaun espesiál WASH, no medida sira seluk. Eskola sira iha Timor-Leste ladún iha kapasidade rasik atu responde ba nesesidade labarik sira ne’ebé iha difikuldade atu rona, haree, ka aprende. Iha obstáculo barak hanesan falta ekipamentu asisténsia, falta formasaun espesializadu ba profesór sira, no alokasaun fundu ne’ebé la suficiente. Tanba ne’e, presiza aloka tan orsamentu atu realiza política edukasaun inkluzív, no kria ambiente edukasaun ida ne’ebé asesível, la diskriminatóriu, no fó apoiu ba EhD. Importante atu asegura katak eskola hotu-hotu iha facilidade báziku ne’ebé akomoda joven sira ho tipu defisiénsia oi-oin, maibé tenke mos konsidera oportunidade ne’ebé iha atu dezenvolve eskola espesializada sira iha fatin sira ne’ebé ho número joven ho defisiénsia ne’ebé aas.


Ministériu Saude (MS) servisu hamutuk ho MSSI atu oferece asisténsia téknika ba sentru saúde mentál sira. Programa ne’e hatutan ona hodi fó apoiu ba ONG sira ne’ebé halo advokasia no fornese asisténsia reabilitasaun ba indivídu sira ne’ebé iha kondisaun saúde mentál. Governu estabelese ona facilidade públiku balun atu suporta ema ho defisiénsia psiku-sosiál. Facilidade importante ida mak Sentru Reabilitasaun<sup>43</sup> São João de Deus<sup>44</sup>, ne’ebé lokaliza iha Postu Administrativu Laklubar Munisípiu Manatuto. Nune'e mós, ONG sira hanesan PRADET, ne’ebé lokaliza iha sidade kapitál Dili, fornese servisu esensial sira hanesan konsellu saúde mentál no ajuda atu fahe ekipamentu médiku ba ema ho defisiénsia psiku-sosiál.

Maske iha ona servisu balun ba indivídu sira ho defisiénsia psiku-sosiál no intelektuál, maibé infraestrutura pública barak liu seidauk asesível ba grupu ida ne'e. Organizasaun lokál Alma Sisters, ne’ebé kongregasaun Katóliku mak harii, halo tratamentu ba labarik sira ho defisiénsia intelektuál. Maske nune'e, maioria asisténsia pesoál no tratamentu médiku ba grupu ida ne'e mak facilita husi ONG sira ne’ebé envolve ativu iha área krítiku hirak ne'e.

#### Parte estadu sira sei foti medida atu:

*Fornese forma asisténsia no intermediária sira, hanesan guia, leitor, no tradutor lian jestuál profisionál sira, atu facilita asesu ba edifísiu no facilidade seluk ne’ebé loke ba público*

CRPD Artigu 9



Ema balun ho moras psiku-sosiál la iha asesu ba ai moruk. Ami presiza apoio no espasu ne’ebé di’ak liu ba ema sira ho moras mental

Key Informant: MSSI

Peskiza ne'e hatudu katak medida asesibilidade alvu sira ne’ebé tenta atu suporta ema ho defisiénsia psiku-sosiál no intelektuál sei limitadu ka la eziste liu. Membru público barak sira seidauk kompriende kona-ba tipu defisiénsia hirak ne'e, tanba dala barak, ema bele defisiénsia maibé defisiénsia rasik ne'e la vizível,

<sup>43</sup> Key informant: National Director for the Promotion of the right of disability staff local points plan and programme. DNPDPD-MSSI., 21 March 2023.

<sup>44</sup> Private Institutions, as the National Center for Mental Health Rehabilitation The main activities are: Mental Health Treatment (hospitalised for three months) which is subject to the Ministry of Health.

no defisiénsia nia sintoma diversu tebes. Tanba ida ne'e, susar atu akomoda sira kompara ho defisiénsia sira seluk. Maske nune'e, NASAUN seluk kria ona medida ba dezeñu universál balun, hanesan fornese apoiu iha fasilitade laran liu husi pesoál ne'ebé simu ona formasaun espesializada, dezeña servisu sira ne'ebé simples atu kompriende no asesu, no masimiza atendimento atu ema barak la bele hein kleur. Fasilitade públiku xave sira idealmente presiza garante asisténsia atuál hodi fasilita asesu ba EhD oi-oin.

IX Governu Konstitusional Timor-Leste servisu ativu atu promove sosiedade ida ne'ebé inkluzívu liu ba EhD. Hahú husi momentu tomada posse iha fulan Jullu 2023, Governu atinji ona rezultadu ne'ebé boot inklui estabelese 'Konsellu Nasional ba Ema ho Defisiénsia' atu suporta implementasaun PNIP-EhD no DNAP. Governu mós hala'o ona auditória ba Sentru Nasional ba Reabilitasaun (SNR), depois restrutura instituisaun. MSSI partisipa ona iha 'Forum Nivel Altu ASEAN kona-ba Parseria no Dezenvolvimentu Inkluzívu ba EhD antes tinan 2025', no subliña kona-ba Timor-Leste nia kompromisu ba iniciativa rejonál sira ho objetivu atu asegura EhD nia asesu ne'ebé hanesan ba servisu no

oportunidade sira. Hahú iha inísiu tinan 2024, programa sensibilizasaun iha munisípiu 13 Timor-Leste nian komesa hodi kombate diskriminasaun hasoru EhD, hasa'e konsiénsia kona-ba EhD nia direitu, no promove envolvimentu síviku iha diskusaun kona-ba política defisiénsia nian. Aleinde ne'e, foin lalais ne'e Konsellu Ministru aprova ona ezbosu Dekretu-Lei ida atu hasa'e pensaun sosiál mensál ba EhD no ferik-katuas sira ba \$60-100 USD, depende ba idade.<sup>45</sup> Ikus liu, Governu lansa ona Portál Seguransa Sosiál online foun ida atu hasa'e EhD nia asesu ba informasaun importante sira kona-ba política, benefísiu, aplikasaun, orsamentu, instituisaun, kontaktu no estatística nasional sira.<sup>46</sup>



Mane nain-rua ho feto ida ho orgullo hatudu sinál liman inkluzau, hodi promove unidade no diversidade  
Foto: Joapico Herman Soares Martins/Oxfam

<sup>45</sup> Decree Law 53/2022 July 20.

<sup>46</sup> Portal da Segurança Social, available online from: <https://segurancasocial.gov.tl/>.



### MAPPING POWER & STAKEHOLDER ANALYSIS

Diretor Nasional Oxfam iha Timor-Leste Fausto Belo Ximenes na'c'o diskursu abertura iha Sorumtu Mapping Power and Stakeholder Analysis.

Foto: Aderito Do Rosario Da Cunha Mambares/Oxfam



Iha sumáriu, Estadu Timor-Leste implementa ona programa oi-oin hodi suporta EhD. Inisiatíva sira inklui dezenvolve política inkluzívu, haforsa kapasidade funzionáriu públiku sira nian, no kolabora ho OED sira. Maske asesibilidade ba infraestrutura barak sei menus, ita bele haree ona progresu, liu-liu iha ministériu xave sira. Maske nune'e, sei iha dezafiu barak, liu-liu iha setór edukasaun, saúde no transporte ne'ebé presiza investimentu no implementasaun política. Inisiatíva sira hanesan kria 'Konsellu Nasional ba Ema ho Defisiensia' no planu sira atu integra padraun dezeñu universál iha lejislasaun hatudu ona Governu nia vontade atu rezolve kestaun hirak ne'e.



Foto ida apresenta ba ema iha grupu ida.  
Foto: Aderito Do Rosario Da Cunha Mambaras/Oxfam

# DEZAFIU SIRA

Obstáculo balun mak hafraku Timor-Leste nia kapasidade atu ezekuta lalais no efetívu Planu Asaun Nasional ba Defisiensia 2021-2030 no kumpre ninia obrigasaun sira bazeia ba Konvensaun Direitu Ema ho Defisiensia (CRPD). CRPD nia vizaun aas tebes, maibé nia implementasaun iha práтика difisil. Dezafiu oi-oin eziste iha mundu reál no kontestu kulturál ne'ebé impede tratadu nia impaktu iha terrenu. Atu bele taka lakuna entre vizaun CRPD no implementasaun iha realidade, presiza atór advokasia no política na'in sira tenke continua halo esforsu bo'ot. Estudu ida ne'e descreve ona fatór sira ne'ebé kontribui ba dezafiu sira ne'e, inklui:

- Atu kumpre ho CRPD, Timor-Leste enfrenta obstáculo institusionál ne'ebé signifikativu, hanesan koordenasaun entre Ministériu no Sekretariádu Estadu sira ne'ebé la efetívu, fundus ne'ebé la adekuadu, no orsamentu ne'ebé la aliñadu ho DMAP. Ida-ne'e resulta departamentu governu balun falla atu inkorpora nesesidade PwD nian ba iha planu no dezeñu infraestrutura pública sira.
- CRPD husu ba estadu sira atu dezenvolve, promulga, no monitoriza padraun no matadalan mínimu ba infraestrutura sira ne'ebé nakloke ba público, tuir prinsípiu dezeñu universal. Maibé, akordu seidauk iha kona-ba modelu ka método ruma atu bele avalia oinsá aplika dezeñu universál ka rezultadu saida mak sei atinji. Uluk, Timor-Leste tenke adopta, adapta, ka dezenvolve padraun sira ne'e bazeia ba práтика di'ak husi nasaun sira seluk.
- CRPD define 'akomodasaun razoável' nu'udar adaptasaun ida ne'ebé nesesáriu no apropiadu, ne'ebé la impoin todan ne'ebé la proporsional ka la apropiadu, ne'ebé presiza iha kazu espesífiku sira atu asegura EhD goza ka ezerse direitu umanu no liberdade fundamental hotu-hotu ho baze igual ho ema seluk. Maske nune'e, termu 'akomodasaun razoável' ne'e ladun klaru no subjetívu liu, no tenke klarifika molok bele implementa política sira.
- CRPD ezije parte Estadu sira atu fó formasaun ba parte interesadu sira kona-ba asuntu asesibilidade hanesan área ida ne'ebé presiza atensaun foku. Atu formasaun bele efetívu liu, tenke fó formasaun ba beneficiáriu oi-oin hanesan funtionáriu público sira, fornesedór servisu sira, empregadór setór privadu sira, edukador ka mestri/mestra sira, profisionál saúde sira, arkitetu sira, enjeñeiru sira, profisionál média sira, no seluk tan. Iha ona progresu liga ho área ida ne'e, maibé presiza nafatin esforsu ne'ebé konsolidadu no koordenadu.

- Asesu ba informasaun ne'ebé limitadu iha Timor-Leste hafraku dizeminasau detallu importante kona-ba defisiénsia, política pública no programa governu liga ho EhD. Maske família sira ne'ebé hetan impaktu husi defisiénsia bele asesu ba seguransa sosiál, atu bele hetan apoiu presize kumpre kritéria espesífika lubuk ida. Família sira tenke iha kartaun identifíkasaun ne'ebé válido no hetan avaliasaun saúde no sosiál husi MS no MSSI. Maibé, prosesu ne'e kompleksu no dezafiu bo'ot. Família barak EhD nian la hatene kona-ba subsídu defisiénsia, tanba ne'e ema barak lakon oportunidade atu hetan assisténsia finanseira.
- Dadus liña baze kona-ba asesibilidade ba infraestrutura pubblica iha Timor-Leste tomak sei limitadu, tanba ne'e susar atu identifíka edifísiu no fatin sira ne'ebé presiza atensaun, no mos impede avaliasaun ba programa no política governu nian liga ho asesibilidade. Dadus barak kona-ba EhD ladun iha kualidade; tanba ne'e esensiál atu hetan dadus ne'ebé loos no dezagregadu atu bele implementa política no planea programa sira. Identifíkasaun ba indivídu sira ho defisiénsia psiku-sosiál no intelektuál ne'e dezafiu bo'ot; verzaun atuál peskiza WGQ ne'ebé sensu nasional utiliza la kapta defisiénsia hirak ne'e.

# **REKOMENDASAUN SIRA**

- IX Governu Konstitusionál Timor-Leste iha knaar atu aliña política no lejizlasaun hotu ho rekerimentu Konvensaun Direitu Ema ho Defisiensia (CRPD) nian. Aliñamentu ida ne'e sai nu'udar baze ida ba implementasaun efetívu obrigasaun hotu-hotu ne'ebé Estadu asume nu'udar parte ba konvensaun ne'e. Aliñamentu mos xave ba objetivu sira ne'ebé deskreve iha Planu Asaun Nasional ba Defisiénsia 2021-2032. Importante tebes ba Governu atu dezenvolve política no matadalan sira ne'ebé adekuadu hodi responde ho kompriensívua ba nesesidade diversu EhD nian.
- Revee Polítika Nasional ba Inkluzauun no Promosaun Direitu Ema ho Defisiénsia. Tenke asegura katak CRPD mak guia política ninia prinsípiu, objetivu no linguajen. Haforsa política nia ámbitu no kompromisu ba konseitu prinsipál direitus umanus. Identifíka intersesaun entre defisiénsia no vulnerabilidade sira seluk atu hasa'e inkluzividade no haluan medida protesaun política nian. Promete atu halo revizaun periódiku bazeia ba komentáriu no sujestaun hosi OED sira atu asegura nia relevánsia no efikásia ba oin.
- Governu tenke halo revizaun ba "Planu Asaun Nasional ba Ema ho Defisiénsia 2021-2030" hodi inkorpora informasaun foun husi Sensu Nasional 2022. Atualizasaun ida ne'e importante atu estabelese meta sira iha nível nasional ba EhD iha Ministériu no Sekretariádu Estadu hotu. Revizaun ne'e sei permite estadu atu dezenvolve lejislasaun no política ne'ebé sei kria impaktu boot liu, no fasilita aloksaun fundus ne'ebé adekuadu hodi responde ba dezafiu sira ne'ebé EhD enfrenta.
- Governu tenke estabelese política no mekanizmu formál ida atu nomeia "Embaixadór Defisiénsia sira" hodi apoia no reprezenta kada Ministériu no Sekretáriu Estadu. Embaixadór sira tenke iha koñesimentu noabilidade ne'ebé nesesária atu halo análise detalladu kona-ba kustu ba nesesidade EhD nian, no tenke iha kapasidade atu envolveativu iha prosesu orsamentu anuál nian.
- Ministériu Obras Públikas subliña ona nesesidade atu aplika padraun dezeñu universál ba infraestrutura pública foun no atuál sira. Maske nune'e, to'o agora MOP konsentra de'it ba nesesidade ema sira ne'ebé iha defisiénsia mobilidade. Nune'e mós, MOP nia Despaixu la'ós legalmente obrigatóriu, tanba ne'e nia implementasaun falta akontabilidade. Tuir lolós, diretiva ne'e tenke implementa liu husi lei foun atu halun ámbitu implementasaun no haforsa implementabilidade. Ida ne'e sei loke dahan ba dezenvolvimentu infraestrutura ne'ebé bele responde ba ema ne'ebé ho defisiénsiu ho tipu oi-oin. Sosializasaun ba padraun dezeñu universál tenke hatutan mos ba setór privadu atu fasilita arkitetu, enjeñeiru no traballador konstrusaun sira atu aplika padraun ne'e ba dezeñu no reabilitasaun edifísiu komersiál públiku sira.

- Governu anterior foti pasu signifikatívu ida bainhira sira introdús tradusaun ba televizaun nacionál uza lian jestuál Amerikanu nian. Maske nune'e, ema sira ne'ebé ho defisiénsia tilun sei hasoru obstákulu tanba laiha lian jestuál ida ne'ebé rekoñese no adapta iha Timor-Leste. Atu hatán ba dezafiu ida ne'e, Governu atuál tenke hahú introdusaun no hanorin lian jestuál padraun ida ba EhD no funsionáriu públiku selesionadu sira.
- Governu tenke fó prioridade ba estabelesimentu parseria forte ho OED sira atu hametin asesibilidade ba infraestrutura pública hotu. Governu bele kolabora ho OED sira, atu nune'e aproveita OED sira nia perspetiva no espesialidade ne'ebé úniku atu adopta medida asesibilidade sira iha edifísiu público no fatin sira. Nune'e mós, bainhira Governu fó kbiit ba DPO sira atu monitoriza implementasaun programa asesibilidade nian, sei asegura responsabilidade no efikásia inisiatíva sira nian. Atu masimíza impaktu husi inisiatíva sira, esforsu kolaborativu ida ne'e tenke haluan ba nível sub-nacionál, hodi asegura kobertura no implementasaun ne'ebé kompriensívu.

# REFERENSIAS

- <sup>1</sup> World Health Organisation (2022) ‘Global Report on Health Equity for Persons with Disabilities’, Geneva, Switzerland
- <sup>2</sup> The World Bank (2023)
- <sup>3</sup> Chua E. (2022) Speech by the head of Timor-Leste’s delegation (i.e., Senior Parliamentary Secretary, Ministry of Social & Family Development, and Ministry of Culture, Community & Youth) during opening remarks at the ‘Singapore Constructive Dialogue on the Convention on the Rights of Persons with Disabilities’, Singapore
- <sup>4</sup> United Nations Economic and Social Commission for Asia and the Pacific (2018) ‘Building Disability-Inclusive Societies in Asia and the Pacific: Assessing Progress of the Incheon Strategy’, Thailand
- <sup>5</sup> United Nations (2023) ‘Situational Analysis Report on the Rights of Persons with Disabilities in Timor-Leste’, Timor-Leste
- <sup>6</sup> Government of Timor-Leste (2023) ‘People-Centred Sustainable Development: Leaving No One Behind’, The Second Voluntary National Review of SDG Implementation Progress (Timor-Leste VNR-2), Timor-Leste
- <sup>7</sup> Government of Timor-Leste (2023) ‘Timor-Leste Population and Housing Census 2022’, Timor-Leste
- <sup>8</sup> Government of Timor-Leste (2002) ‘Constitution of the Democratic of Timor-Leste’, Timor-Leste.
- <sup>9</sup> Timor-Leste Associação de Deficientes de Timor-Leste et al. (2021) ‘Timor-Leste Disability Sector’s Joint Submission on the Progress and Challenges of Disability Inclusive Development in Timor-Leste: Universal Periodic Review Report for 2021’, Dili, Timor-Leste
- <sup>10</sup> Government of Timor-Leste (2016) ‘Timor-Leste Demographic Health Survey 2016’, Ministry of Planning & Finance and the Ministry of Health, Dili, Timor-Leste

<sup>11</sup> United Nations (2022) 'Report for the Universal Periodic Review (UPR) of Timor-Leste: 40th Session of the UPR Working Group 2022', United Nations Country Team, Dili, Timor-Leste

<sup>12</sup> Ray S. (2024) Remarks by Mr. Soumen Ray (Chief of Social Policy and PME; UNICEF) at the 'Workshop on Disability Data and M&E', 12th March 2024, Office of the National Institute of Statistics Timor-Leste, Dili, Timor-Leste

<sup>13</sup> Government of Timor-Leste (2021). 'Planuasaun Nasional Ba Ema Ho Definsiensia 2021-2030', Dili, Timor-Leste

<sup>14</sup> United Nations (2024) 'Convention on the Rights of Persons with Disabilities', available online from: <https://social.desa.un.org/issues/disability>

<sup>15</sup> Washington Group on Disability and Statistics (2024) 'Washington Group Short Set on Functioning (WG-SS)', available online from: <https://www.washingtongroup-disability.com/>

<sup>16</sup> Group on Disability and Statistics (2024) 'Washington Group Short Set on Functioning (WG-SS)', bele asesu iha: <https://www.washingtongroup-disability.com/>

<sup>17</sup> Oxfam International (2020) 'Ethical Content Guidelines: Upholding the Rights of the People in the Pictures in Content Gathering, Management and Use', The Hague, Netherlands

<sup>18</sup> United Nations (2024) 'Committee on the Rights of Persons with Disabilities', available online from: <https://www.ohchr.org/en/treaty-bodies/crpd/introduction-committee>

<sup>19</sup> Government of Timor-Leste (2012) Government Resolution No. 14/12 'National Policy for Inclusion and Promotion of the Rights of People with Disabilities', Dili, Timor-Leste

<sup>20</sup> Government of Timor-Leste (2011) Timor-Leste's Strategic Development Plan (2011-2030), Dili, Timor-Leste

<sup>21</sup> Government of Timor-Leste (2023) 'Planu Estratéjiku Dezenvolvimentu—Reajustadu ba 2023-2038, Dili, Timor-Leste

<sup>22</sup> UNICEF (2016) EquiFrame

<sup>23</sup> Equiframe tool original tool reference

<sup>24</sup> Old 2014 DNAP

<sup>25</sup> Resolution 14/2019 promotion of PwD

<sup>26</sup> Timor-Leste Ministry of Finance and UNICEF (2021) 'Options Paper: Understanding and Measuring Multidimensional Poverty in Timor-Leste', Timor-Leste

<sup>27</sup> Fernandes J., Cooke S, Nguyen H. (2011) 'Building Skills in Disability Inclusive WASH: Perspectives from a DPO in Timor-Leste', WaterAid, Timor-Leste

<sup>28</sup> Key informant: Ambassador for Persons with Disabilities, Ministry of Education, Youth & Sports



Envolvimentu iha diskusaun ne'ebé di'ak, feto na'in rua no mane  
ida kolabora fahe ideia no hanoin hamutuk.

Foto: Aderito Do Rosario Da Cunha Mambares /Oxfam



**OXFAM**

**ANCP**

**Australian  
AID** 